

Stretim ilektoral mak bipo 2017 ileksen-Trawen

Stanley Nondol i raitim

ILEKTORAL Komisina Andrew Trawen i laik rivi bilong ol ilektoral baundri i mas kamap na bai i ken kamapim moa nupela provins, ilektoret na ol LLG bipo long 2017 nesanel ileksen.

Em i wetim gavman long givim sapot na bai dispela wok i kamap.

Mista Trawen em i siaman bilong Ilektoral Baundri Komisina (EBC) i tok 89 Open Ilektoret na 22 provinsal ilektoret em palamen i oraitim long Februeri 1977 na i

gat nid long rivi i kamap.

Mista Trawen i mekim dispela toktok long dispela wik bihain long planti memba bilong palamen i singaut long rivi i mas kamap long ol ilektoral baundri.

EBC siaman i tok ilektoral baundri bilong 1977 em bilong bipo tru,

tupela yia bihain long indepeden na long dispela taim populesen bilong kantri bin stap daunbilo tru.

Em i tok nau populesen i gro na i sanap long 7.3 milien.

Moa stori long pes 2...



CBC AGM: Namba 56 bikipela bung bilong ol Katolik Bisop i kamap nau long Emaus Senta long Don Bosco, Taurama insait long Pot Mosbi. Bung i bin stat aste Epril 15 na bai pinis long neks wik Epril 23. Bai gat ol bikipela toktok i karamapim sios na kantri i kamap long dispela bung. Poto i soim Bisop Francesco Sarego bilong Goroka, Bisop Christian Blouin CMM bilong Lae, Asbisop Francesco Panfilo bilong Rabaul Asdaosis na Bisop Bill Fey bilong Kimbe Daiosis long stat bilong AGM aste. **Poto: Nicky Bernard**

INSAIT:

**Bai-Ileksen
bilong Goilala
na Wes Sepik**

- P2



**UPNG
selebretim
namba 60
greduesen- P3**

Komentri



**Korapsen i
wok long
kilim gutpela
sindaun
bilong bihain
taim - P13**

**CONNECTING YOU TO
ASIA & BEYOND**

Experience a new level of comfort and service.



Air Niugini
www.airniugini.com.pg
EXCLUSIVE CARRIER FOR THE 2015 PACIFIC GAMES



Bai gat bai-ileksen bilong Goilala na Wes Sepik rijonal

Stanley Nondol i raitim

ILEKTORAL Komisina Andrew i tokaut olsem bai gat bai-ileksen i kamap long Goilala open na Wes Sepik provinsal sit.

Goilaia open sit i stap nating bi-hain long memba Daneil Mona i dai long dispela yia. Long Wes Sepik rijonal em suprim kot i rausim Akmat Mai olsem memba bilong Wes Sepik rijonal sit.

Mista Trawen i tok long Ilektral Komisina i givim sampela taim long long ol famili, pren na ol pipel bilong Goilala distrik stretim haus kra i bilong ol pastaim na wok bilong bai ileksen i stat.

Na long Wes Sepik, Suprim kot i rausim memba na givim oda long bai ileksen i mas kamap kwik.

Ilektral Komisina i tok bai ol i lusim K14.6 milien long dispela tupela bai ileksen, K4.6 milien bilong Goilaia open na K10 milien bilong Wes Sepik rijonal.

Mista Trawen i tok em i salim askim long dispela mani go pinis long Tresari na wetim mani long statim bai ileksen long pinis bilong dispela mun o stat bilong mun Me.

Em i tok taim gavman i givim mani, PNGEC bai makim ritening opisa na asisten ritening opisa na bai statim wok bilong bai ileksen long Goilala na Wes Sepik.

Mista Trawen i tok olsem PNGEC bai hoilm bai ileksen long ol ilektoret we kot i givim tok orait tasol long en. Na taim hevi i stap yet long kot bai PNGEC i no inap wokim wanpela samting ianp mekim wanpela samting.

Long wankain taim Mista Trawen i tok ol wok redi bilong bai-ileksen long Pomio Open i orait na ol 11-pela kendidet i kempen yet long ol pipel bai makim nupela lida long Me 9.

Pomio bai ileksen i kamap bihain long kot i kalabusim memba bipo, Paul Tiensten.



Ilektral Komisina, Andrew Trawen.



PPL joinim bek pawa saplai i go long Madang. Foto: James G. Kila

PPL joinim bek pawa saplai long Ramu grid go Madang

JAMES G. KILA i raitim

PNG PAWA Limited i joinim gen pawa saplai i go bek long Madang wanpela mun bihain long bikipela taitwara i brukim daun ol pawa lain long Ramu haiwe rot.

Dispela wok i pinis long las wik na nomol pawa saplai nau i ran long Yonki pawa stesin long Isten Hailans i go long Madang.

Bikipela bagarap tru i bin kamap long seksen bilong rot klostu long Aumia bris namel long Madang na Ramu suga we i tait-wara i krungutim ol strongpela ain pos olsem samting nating

na i go daun.

Ol bagarap i kamap long pawa pos na lain long haiwe i givim bikipela hevi tru long ol bisnis na pipel bilong Madang provins husat i save kisim pawa bilong Ramu grid long Yonki PPL pawa stesin.

Long las wik Sif Eksekutiv Opisa bilong PPL, John Tangit i tokaut olsem pawa Madang i save kisim long Ramu grid long Yonki i orait na saplai nau i go long Madang.

Aset Menesa bilong PPL long Madang, Bustin Joseph long wanpela miting wantaim ol bos bilong bikipela main-ing kapani long Madang, Ramu NiCo

Menesmen (MCC) i tokaut olsem Madang taun i nidim samting olsem 10 megawat pawa saplai. Tasol dispela stend-bai jenereta em i gat long Madang taun inap long givim tasol 4.5 megawat, olsem na taim hevi i bin kamap long pawa pos i pun-daun, PPL i bin wokim ol lod-seding long serim pawa long ol kastoma bilong en insait long Madang taun eria.

Planti ol manmeri husat i ran long haiwe i go olsem long Aumia i no bilip stret taim ol i lukim seven pela ain pawa pos em tait-wara i krungutim na slipim go daun olsem samting nating stret.

Tupela marit kamapim histri long ileksen

TUPELA marit long Bogenvil i kamapim nupela stori long histori bilong ABG long resis long ol konstituensi sit bilong dispela yia ABG Jeneral Ilekten.

Wanpela bisnisman Martin Miriori i sanap resis long loro konstituensi sit long Panguna distrik, Sentral Bogenvil na meri bilong em Scholastica i lukluk long sanap long Tistalato konstituensi long Buka.

Mista Miriori, husat i bikipela brata bilong leit ABG presiden Joseph Kabui, i bin resis long kisim sit bilong presiden bilong Bogenvil long

ol ileksen i go pinis. Tasol dispela taim em i putim han i go antap long resis insait long konstituensi bilong em yet.

Mista na Misis Miriori i putim nominesen bilong tupela long las wik em i nupela samting tru long kamap olsem tupela i resis long wankain jeneral ileksen.

Na tu i gat wanpela nupela samting i kamap em long namba bilong ol Katolik pris husat i sanap ran long dispela jeneral ileksen.

Pastaim Vika-Jeneral bilong Bogenvil Katolik Daiosis, Pater John Bosco Kensi i wok long resis long

Atolls konstituensi sit long Not Bogenvil, Pater Simon Dumarinu i wok long sanap long resis wantaim Sif John Momis long Bogenvil Presiden sit. Pater Bosco em i bilong Carterets Ailan na Pater Simon Dumarinu em bilong loro Konstituensi long Panguna distrik bilong Sentral Bogenvil.

Narapela samting i kamap em long tupela brata i resis long wanpela konstituensi sit. Kenidet Jerry Kavop na liklik brata bilong em Kout i wok long resis long Tonsu konstituensi sit long Buka Ailan.

Oposisen i no wanbel long edukesen sistem

PALAMEN Memba bilong Sumkar na Sedo Minista bilong Edukesen, Ken Fairweather i bin tokaut long dispela wik olsem oposisen i no amamas long wok bilong edukesen sistem.

Mista Fairweather i tok olsem long lukluk bilong oposisen, em i luk olsem edukesen sistem nau i no go gut long pinisim gut laik na tingting bilong kantri.

Em i tok, gavman i no bringim gut sevis. Bilong wanem i no gat planti klia sain tumas long 2012 i kam olsem ol Gavman Polisi long Edukesen long PNG nau bai soim olsem ol dispela gavman polisi nau i stap em i no inap long

lukautim ol yet long go long-pela taim bihain.

Em i givim sampela eksampel olsem, long Desember 2014 ol Liv tiket na mani bilong ol tisa i no kamap gut, na long Februari 2015, Skul Projek Fi o No gat Projek Fi i kamap we Marape i tok Yes long Palamen na Kuman i tok nogat long ausait.

Long Februari na Mas 2015, mani i kam sot long ol skul na i no inap long olgeta wok bilong ol skul. Mak bilong mani em i no inap long namba bilong ol pikinini.

Long mun Epril 2015, K90 milien bai i go long wok

bilong tem 3 bilong skul. Dispela em mak bilong K45 long wan wan sumatin.

"Yu mas tok pilai yah! Dispela kain mani bai mekim wanem? I gat 2 milien skul pikinini insait long ol skul we 30,000 i kam long distrik bilong mi," Mista Fairweather i tok.

Planti memba bilong Palamen nau i wok long helpim ol skul na long SumKar yet em K1.6 milien i go pinis long skul na tu ol Teseri skul fi i go antap yet.

Mista Fairweather i singaut long gavman i mas givim trupela piksa bilong olgeta eria bilong kos bilong Edukesen long kantri.

Oposisen i ting olsem mani gavman i lusim long baim ol skul steseneri em i giaman tasol. Ol skul i no laikim.

Em i tok olsem baset bilong kantri i no inap long karim yet ol kos bilong fri edukesen na fri helt sevis polisi bikos mak bilong karim pikinini i wok long go antap yet long 3.3 pesen long wanpela yia.

"Yumi mas daunim ol kos nau, sapos no gat bai gavman i apim ol takis moa! Yumi no inap long tromoi mani bilong LNG nating na pilim gut long ol polisi. Yu mas stretim na kamapim ol gutpela infrastraksa!" Mista Fairweather i tok.

Stretim ilektoral mak bipo 2017 ileksen-Trawen

I kam long pes 1...

PNG i gat 111 memba bilong palamen, 22 provinsal na 89 open ilektoral. Mista Trawen i tok dispela i no senis maski riviui bilong baundri i bin kamap long 1981, 1985, 1986, 1991 na 2005. Em i tok gavman i no tokorait long ol dispela riviui na lukim ol baundri bilong bipo i stap yet inap nau.

Em i tok EBC i stretim ol program bilong riviui pinis na wetim K19.8 milien long nesenel gavman long mekim wok.

"Wanem samting baundri komisina i laikim nau em long palamen i mas kwiktam amendim o kamapim senis long provision bilong Nesnel Konstitusen long givim tok orait long apim 89 ilektoret i go antap.

Sapos dispela i no kamap, EBC bai hat long mekim riviui."

"Baundri riviui inap long kamap long 2013 na bai go het inap long 2016 tasol long 2013 yet gavman i no putim mani long dispela."

"Bikipela hevi nau em populesen i gro, ol besik sevis bilong ol pipel, skelim ol risos bilong kantri stret i go long olgeta pipel, na i gat makim bilong olgeta manmeri long nesenel palamen em wanpela bikipela hevi ol memba bilong palamen i toktok yet long palamen namba bilong open na provinsal ilektoret i mas go antap."

Mista Trawen i tok baundri riviui bilong provinsal ilektoret, open ilektoret, LLG na wod i mas kamap bipo long 2017 ileksen long helpim EC kamap wantaim stretpela ilektoral rot bilong vot.

Em i konstitusinal duti bilong

EBC long mekim riviui bilong ol ilektoral baundri na givim long palamen long tok orait long kamapim nupela provins na distrik o rausim na bungim ol boda mak bilong ol ilektoret na provins.

Long wankain taim Long 2011, Somare gavman i givim Hela na Jiwaka nupela provins.

Na Spesel Baundri Riviui Komisina bilong Hela na Jiwaka i tok moa riviui i mas kamap long senis bai kamap long LLG baundri wantaim ilektoral baundri tasol dispela i no kamap yet.

Mista Trawen i tok long taim bilong pablik foram long Jiwaka na Hela, planti komyuniti i tok ples klia long ol nid bilong gavman sevis olsem rot, helt, bris na edukesen.

UPNG i selebretim namba 60 greduesen

Esther Bralyn Wani i raitim

YUNIVESITI ov Papua Niugini (UPNG) i selebretim 60th greduesen insait long wankain yia wantaim Golden Jubili bilong skul taim ol i selebretim 50 yia bilong lidasip insait long Haia Edukesen long kantri na Pasifik tu.

Long dispela greduesen, opis bilong rejistra i tokaut olsem 1, 310 sumatin i pinisim skul we sampela sumatin i kisim Honas na Mastas long Medesin na Helt Sains, na Neterel na Fisikel Sains insait long tupela de long Fonde na Fraide.

Praim Minista Peter O'Neill i tokim ol sumatin na tisa bilong UPNG olsem long neks tupela yia bai gavman i givim K100 milien long skul long stretim ol infrastraksa na ol akedemik stended bilong skul.

Em i tok moa olsem taim Pasifik Gems i pinis bai ol sumatin i ken muv go insait long 4000 rum we ol i bildim bilong ol pilaia long yusim long nupela Gems Viles.

Dispela greduesen i stat wantaim Skul ov Lo na Skul ov Medesin na Helt Sainses long Fonde moning na Skul ov Humanitis na Sosol Sainses long apinun.

Long Fraide moning, Skul ov Neterel na Fisikel Sainses i greduet na Skul ov Bisnis Edministresen long apinun.

Praim Minista Peter O'Neill, Minista bilong Haia Edukesen, Rises, Sains na Teknoloji, Malakai Tabar, Seketeri bilong Pesonal Menesmen, John Kali na Jenerel Menesa bilong Barrick PNG, Anthony Smare i bin kam toktok long ol sumatin long wan wan hap bilong greduesen.

Ol sumatin i bilas long kain kain bilas na ol i amamas tru olsem olgeta hatwok bilong ol i karim kaikai nau.

Long wankain taim, ol mama papa na ol wantok i kam long ol longwe hap na insait long Pot Mosbi yet long lukim ol pikinini bilong ol i pinisim skul. Sampela i soim amamas bilong ol na singaut na kra i long taim ol pikinini i go kisim pepa bilong ol.

Ol 4-pela memba long Bogenvil i no inap resis

OL 4-pela memba bilong Bogenvil Haus bilong ol Representiv i no inap resis long kisim bek ol sit bilong ol long dispela Atonomos Bogenvil Gavman (ABG) Jenerel Ileksen.

Dispela em memba bilong Nisan konstitensi long Not Bogenvil, Leo Hannett, olupela kombaten representiv bilong Sentrel Bogenvil, David Sisito, memba bilong Kokoda, Joseph Bausina na olupela kombaten representiv bilong Saut Bogenvil, Michael Laita.

Mista Sisito bai resis long Saut Nasioi sit we John Ken i stap memba long en na Mista Laita long Saut Bogenvil i laik resis long Makis konstitensi.

Mista Laita i laik resis na rausim memba bilong Makis sit na ABG Minista bilong Lens na Fisikel Plening Newton Kauva.

Olpela MP bilong Bogenvile Rijinel insait long Nesenek Palamen na memba bilong Nisan Leo Hannett i no inap resis bikos em i lapun na em i no pilim orait long resis.

Tasol wanem as Mista Bausina i no inap resis long sit bilong em i no klia o ol i no save.

Long wankain taim, namba 5 sit long ABG palamen we i stap nating em Bolave insait long Bana distrik long Saut Bogenvil.

Dispela sit i bin stap nating taim memba bilong ol, Lawrence Wakai i bin dai long dispela yia.



NAMBA 60 UPNG GREDU-SEN: Long dispela yia, Golden jubili yia bilong UPNG we em i selebretim 50 krismas, moa long 1,300 sumatin i bin greduet long las wik Fonde na Fraide. Poto i soim Eric Niles, pikinini bilong biknem meri long midia long PNG na olupela bos bilong *Wantok Niuspepa*, Anna Solomon, i sanap wantaim ol poroman bilong em bihain long greduesen seremoni. Eric i bin greduet long Sains na meja long Kemistri. **Poto: Anna Solomon**



2015 Pacific Games **TICKET GIVEAWAY!**

Simply purchase airtime **TOP UPs** via BSP Mobile Banking during **APRIL** to be selected. Customers will be contacted directly with details posted on BSP's Social Media.

TOP UP NOW *131#



20 x general admission double passes plus 1 major pass to be given away weekly.

www.bsp.com.pg



EMTV wok poroman wantaim Esia Visen netwok (AVN)

Bikpela televisen stesin long PNG, EMTV, i kamapim nupela wok poroman wantaim wanpela bilong Esia-Pasifik nius sevis em Esia vision Network (AVN).

Wok poroman i givim EMTV rot long kism bikpela ples moa long kism ol toktok na piksa bilong brotkas i kam long dispela bikpela nius sanel i stap long moa long 20 kantri stat long Turkey long Wes i go long Australia na Pasifik.

Sif Eksekutiv bilong

EMTV, Bhanu Sud i tok olsem dispela wok poroman em i kam long mak bilong EMTV stret long lukluk bilong em long kamap olsem lida long nius na toktok bilong tude insait long Pasifik rijon. Em i mekim dispela toktok long Sendai, Japan long namba wan EMTV wantaim Esiavisen Nius Grup konprens.

"Mi amamas long dispela kain pasin bilong wok bung bikos em i helpim EMTV long bringim nius i go long dispela nius grup olsem wanpela nius sevis memba

bilong Pasifik komyuniti.

"Mipela i gat tingting long kamapim wanpela we bilong lukluk long olgeta hap graun wantaim ol nius na toktok bilong tude insait long Papua Niugini na long Esia-Pasifik," Mista Sud i tok.

"Dispela kain rot i givim mipela gutpela hap bilong sanap long mekim ol bikpela wok olsem bikpela APEC miting we bai kamap long Pot Mosbi long 2018 we mipela i gat plen long givim moa nius na toksave long en," em i tok.

EMTV bai wok bung long kamapim ol ripot bilong ol taim no gut

Papua Niugini Pablik brodkasta i wok long painim we bilong kamapim ol patnasip wantaim ol ki gavman na praivet stekholda long kamapim moa luksave na moa gutpela we bilong luksave long ol taim bilong hevi na long givim ripot long on.

Dispela bikpela tingting i bin kamap bihain long EMTV sif eksekutiv, Bhanu Sud na Lae Buro Sif, Scott Waide i bin go bung wantaim Esiavisien nius grup memba long Sendai, Japan long las mun.

Sedai Siti em i gutpela hap long bung bikos

em i wanpela ples long Japan we i bin kism taim stret long sunami bagarap long 21 senseri we 500 pipel i bin dai. Dispela miting tu i bin go wantaim Yunaitet Nesens Miting long stopim disasta.

"Mipela i lainim sampela samting long ekspiriens bilong lida pablik brodkasta, NHK na mipela i gat tingting long kamapim ol gutpela wok patnasip wantaim ol bikpela gavman ejensi olsem Yunaitet Nesens, Nesanel Disasta na Imejensi Senta, Nesanel Egrikalsa Risets Institut na ol provinsal disasta ejensi," EMTV CEO, Bhanu Sud i tok.

"Papua Niugini em i isi long kism ol disasta o taim no gut an em i gutpela olsem mipela olsem wanpela pablik brodkasta, i mas kism dispela wok bilong givim aut ol bikpela na trupela toksave long kain kain we," Mista Sud i tok.

EMTV i laik mekim ol lain i save lukluk long nius long ol i mas gat bilip long wanem kain nius i save kamap olsem bai ol i ken kism gut ol toksave na nius bilong ol disasta o taim no gut na ol i ken redi long en.

Indoneisa Polis kalabusim ol PNG long spakbrus

OL POLIS long Indonesia i holim pasim 17 man long Papua Niugini na kalabusim ol long hap na sasim ol long karim drag I go insait long Indonesia. Dispela kain hevi i save karim det penelti long Indonesia.

Wanpela yangpela boi, krismas 17 i stap namel long dispela hevi na olgeta i stap nau long haus kalabus long Indonesia.

Provinsal Polis Komanda (PPC) bilong Sandaun Robert Gesa i tok i gat bikpela maket bilong spak brus o mariwana long Papua provins long Indonesia. Na ol lain long hap i save baim wanpela kilogram long 1-milien Indonesia rupiah o K300.

PPC Gea i tok PNG i amamas long gutpela prais bilong spak brus tasol i no save long wanem kain mekim save ol bai kism aninit long drag lo bilong Indonesia. Na dispela drag i save karim det penelti o indonesia gavman i ken kilim ol i dai aninit long lo bilong ol.

Mista Gesa i tok Indonesia gavman i gat strongpela lo i tambu long spak brus o drag na ol pipel bilong PNG i mas save na i no ken kism drag go long hap long salim na mekim bikpela mani bikos laip bilong ol i stap long mak nogut.

"I gat bikpela tambu long drag long indonesia na mi laikim ol PNG long ritim long pepa na save long mekim save Indonesia gavman i save givim long husait i brukim drag lo. Em i no olsem PNG we yu ken kam aut isi long ol krait bilong drag smagling," PPCGesa i tok

Em i tok 17 yut nau stap long Sentai haus klubus bihain long ol polis bilong Indonesia i holim em na kism 20 kilogram spakbrus em i karim i go long salim long ol klaien long Wes Papua.

Narapela man long Wes Sepik tu polis i holim pasim em wantaim 20 kilogram spakbrus. Polis i tok em i namba tu taim dispela man i kism spakbrus i go insait long Indonesia.

Mista Gesa i tok dispel tupela man ya i joinim ol 15 man PNG, wanpela bilong Madang na olgeta bilong East Sepik na West Sepik long Boau haus kalabus long Indonesia.

Mista Gesa i tok ol 15 i gat ol liklik ol asua olsem ol peti krait tasol dispela yut tasol i kism bikpela spka brus saplai go insait long Indonesia.

Bikpela man bilong NRI i dai

OL Kaunsil, Menesmen, na ol woklain bilong Nesanel Rises Institut (NRI) i wari long dai bilong wanpela wokman husat i save go pas long mekim wok painimaut long politik.

Dokta Ray Anere i save laikim tru wok bilong em na em i save helpim wantaim save bilong em long politikel saiens olsem long ileksen, ol politikel pati, ol meri insait long politik; Gavanens long PNG; gutpela sevis dileveri, ol enti-korapsen isu; PNG Pablik Sekta na Nesanel na Domestik Sekyuriti.

Dokta Anere i save serim laik bilong em long politik wantaim ol midia long stretim ol toktok.

Em i save mekim ol koment na givim ol solusen long ol bikpela developmen isu i save afektim PNG. Em i save gat taim bilong ol midia long wanem em i save laik long tokaut gut long ol pablik.

Em i wanpela bilong ol namba wan Papua Niugini long kism Doktoret long Politikel saiens long 1993. Em i givim bikpela laip bilong em long tis na akademik. Em i bin stap wantaim Politikel Saiens Strend long Yunivesiti ov Papua Niugini



Dokta Ray Anere.

olsem 23 krismas (1980-2003). bin Siaman bilong Nesanel Bipo long em joinim NRI, em Kapitool Distrik Komisn Taskfos,

Ministri bilong Inta-Gavman Rilesen, long Opis bilong Mista.

Dokta Anere i bin joinim Institut olsem Sinia Rises Felo na Het bilong pastaim Politikel na ol Ligel Stadi Divisen long 2006. Em i save wok long stretim ol ileksen sistem na ol proses; na mekim gut gavanens mekenisim long nesanel na sabnesanel level.

Wanpela ripot em i mekim long saun gavanens fremwok bilong mekim gut besik sevis deliveri we em Deputi Praitim Minista bai lonsim long Epril 9 bai ol i surukim gen long bihain.

Em i tingting long lusim wok long pinis bilong dispela mun na go bek long ples bilong em long Milen Be long wok long wanpela Gavanens Projek tasol em i dai.

"Olgeta ol wok bilong em long planti developmen isu i afektim kantri bai PNG i misim. PNG i lusim wanpela bikpela save man, na man i save go pas olsem politikel saintis husat i save givim taim na save bilong em long helpim developmen bilong PNG," Dairekta bilong NRI, Dokta Thomas Webster i tok.

Visa bilong gems ol i givim long Pot Mosbi- Australia nogat

OL WOKMAN bilong Dipatmen bilong Imigrasen bai go long Nofok Ailan long stretim visa bilong tim bilong 2015 Pasifik Gems tasol Australia bai go long nomol rot long kism visa pastaim na kam long PNG.

Ol etlit na gems opisa bilong ol arapela Pasifik ailan kantri i luk olsem ol bai kam na kism visa long Jackson ples balus long Pot Mosbi.

Ogenaising Komiti bilong gems i tok PNG gavman i laik soim laikim pasin long Nofok Ailain long givim visa pastaim long kantri bilong ol na ol bai redi long hap yet na kam long Pot Mosbi.

Ol Nofok i save holim Australia Paspot bai lukim ol i kism visa stret long kantri bi-

long ol. PNG gavman bai tok save i go long Nofok Ailan gavman long dispela pasin PNG laik soim long ol.

Wanpela ripot bilong Imigrasen Dipatmen i tok 2015 Gems opis bai baim rot bilong ol opisa bilong dipatmen long go long Nofok na stretim visa long tupela de.

Em i tok Australia i rispektim lo bilong visa PNG i gat na i no askim long kism sampela spesel sevis olsem Nofok Ailan.

Na long ol arapela kantri husat bai pilai long Pasifik Gems, PNG gavman bai yusim spesel iven visa na ol bai no inap long hat long kism visa long kantri bilong ol. Tasol ol bai kam na kism visa long Pot Mosbi taim ol i pundaun long Jackson ples balus.

Dispela spesel visa bai stat long Jun 1 long mekim isi long ol opisa na ol etlit bilong Pasifik Gems.

Dispela kain pasin bilong givim spesel visa i save kamap long ol arapela kantri long wol we i holim ol bikpela kibung, iven na ol gems.

Nofok Ailain i save holim paspot bilong Australia na i no gat PNG embasi long hap long ol bai stretim visa eplikesen.

Nofok bai salim namel long 24 na 26 lain i kam long PNG long Pasifik Gems na Australia bai salim moa long 60 i kam.

Australia i save bihainim gut rul na ol lo bilong kism visa bilong PNG olsem na ol bai kism long Australia yet na kam insait long kantri.

PNG i mas invest long edukesen

OL Papua Niugini i no inap kamapim gutpela sindaun bilong kantri long bihain taim sapos ol i no invest long edukesen bilong ol pikinini.

Bod Siaman bilong Ok Tedi Maining Limited (OTML), Sir Moi Avei i tokim ol papamama long Tabubil Elementri Skul (TES) taim em i opim 6-pela nupela elementri klasrum na 12-pela ol liklik haus bilong ol tisa long Fonde, Epril 9.

“Yumi mas tokim yumi

yet olsem bikpela aset long PNG em i no long ol mineral tasol, bikpela aset em ol pikinini,” Sir Moi i tok.

Sir Moi i amamas long olpela bod bilong OTML na CEO na MD Nigel Parker, long driman na komitmen long mekim edukesen isi long ol pipel bilong Westen provins.

Em i tokim ol tisa, sumatin na mamapapa long lukautim gut ol klasrum na ol liklik haus tisa na stretim ol bilding sapos ol i bagarap.

Sif Opereting Opisa bilong OTML, Musje Werror, i tok OTML na PNG gavman i givim mani long sanapim ol dispela bilding.

Mista Werror i tok gavman i givim mani K1.8 milien long sanapim ol klasrum na mani ol i rausim long dividen bilong OTML na OTML i fandim ol liklik tisa haus long PGK2.7 milien.

Em i tok moa olsem Star Maunten Lokal Level Gavman i givim PGK105, 000 long wokim dispela ol bilding.

Siaman bilong TES, Robin Tapkisoleng, i tok tenkyu long OTML long gohet long sapotim edukesen insait long provins.

Em i tok dispela helpim bilong OTML bai givim gutpela tingting long ol tisa na sumatin long wok na lainim ol samting wantaim.

Mista Tapkisoleng i tok ol bai givim nem bilong ol liklik haus tisa olsem ol Parker Yunit long tingim CEO na MD bilong OTML bipo, Nigel Parker.



Sir Moi Avei: PNG mas invest long edikesen.

O'Neill givim K200,000 long Kristen Helt Sevis Konprens

Frieda Sila Kana i raitim

PRAIM Minista bilong Papua Niugini, Peter O'Neill i bin tok promis long givim K200,000 i go long Sios Helt Sevis long baim olgeta kos bilong namba 45 Enuel Helt Sevis we ol i bin holim long Gateway Hotel long Pot Mosbi, long dispela wik.

OL lain i makim ol wan wan sios helt sevis long ol provins na distrik bin kamap long Pot Mosbi na ol i bin gat bikpela amamas tru long lukim Praim Minista bilong kantri i go long opim kibung. Siaman bilong ol i bin tok olsem dispela em i namba wan taim tru long wanpela Praim Minista i bekim tok na i kamap long miting bilong ol sios helt sevis.

I gat 23 ful memba na 4-pela sasosiet memba bilong Kristen Helt Sevis husat i save lukautim 40 oesen bilong olgeta helt wok long kantri, moa long rural eria, na i gat 4,000 moa wokman na wokmeri long kantri.

Praim Minista O'Neill i bin tok olsem, planti bilong yumi long Papua Niugini i bin kamap long



Praim Minista O'Neill i kisim wanpela tenkyu presen long ol Sios Helt Sevis long em i ken putim long opis bilong em. *Poto: Frieda Sila Kana*

wanpela kain liklik ples long bus na bikpela samting. Em i mekim luk-save long olgeta wok ol sios helt

sevis i save givim long kantri. Praim Minista i givim tok bilong givim bel isi long ol helt woka olsem ol toktok i kamap long ol nius olsem kantri i no gat inap mani em i tok bilong politik tasol.

“Wanem kain tok promis gavman i mekim long givim em mipela bai mekim. Sampela bilong mipela long gavman i save long wanem kain we mani bilong kantri i save ran.

Mipela i no mekim nating. Olsem na mipela bai go het yet long givim fri edukesen na tu long fri na hap helpim bilong helt sevis tu,” Mista O'Neill i tok.

Praim Minista i tok moa olsem gavman i putim K148 milien i go long Sios Helt Sevis long baset bilong 2015. Dispela mani mak i winim bilong 2014 we gavman i bin givim K106 milion i go long sios helt sevis.

Insait long las 4-pela yia, gavman i bin putim K4 bilien i go long helt bikos em i wanpela bilong ol namba wan prairiti bilong dispela gavman.

Antap long dispelaK300 milien i

go pinis long ol skul long kantri stat long 2012 i kam nau long 2015.

Sif Eksekutiv Opisa bilong Sios Helt Sevis, Joseph Sika i tok ol sios nau i redi long tekova long olgeta wok bilong helt long rural eria insait long 5 yia bihain.

“Sios em i stap klostu wantaim ol pipel olsem na mipela bai mekim gutpela wok,” Mista Sika i tok.

Olsem na em i putim askim i go long Praim Minista long gavman i mas larim ol dispela helt sevis long rural eria i go long ol sios helt ejensi long ranim.

“Sios Helt Sevis i singaut long yu kam lukim mipela i no long askim yu long wanpela samting moa. Nogat. Mipela singautim yu long kam na mipela i laik tok tenkyu long yu long yu harim kraibilong mipela long helpim ol wok bilong sios long helt sevis insait long kantri. Luk-save yu givim em i winim olgeta gavman i go pas long yu,” Mista Sika i tok.

“Ol sios woka i tok promis long prea long God long dispela gavman na tok tenkyu long gutpela wok em i mekim.

PM singaut long ol pipel kirapim bisnis

PRAIM Minista Peter i singaut long ol pipel long Papua Niugini long kirapim bisnis bikos ikonomi bilong kantri i gro na gavman i redi long sapotim pipel long statim na groim ol bisnis.

Mista O'Neill i tok ikonomi bilong kantri i gro na i gat bikpela sans i stap long ol liklik manmeri i ken wokim bisnis.

Em i mekim dispela tok-tok las wik long Mendi long taim bilong opim nupela hotel, Mendi Travellers Inn long Mendi Taun, Sauten Hailans.

O'Neill em bilong lalibu Pangia, Sauten Hailans. Em i tok em i amamas long lukim olsem ol bisnis long

Mendi i wok long gro na kamapim planti wok na opim rot bilong moa mani bai go inait long provins long ol pipel i ken kisim sevis na amamas.

Praim Minista O'Neill i tok gavman bilong em i lukluk long sapotim bisnis long gro na sapotim ikonomi bilong kantri. Na i putim bikpela mani long ol arapela infrastraksa olsem lo na oda long opim rot bilong bisnis.

“Nau em i gutpela taim bilong wokim bisnis. Ol bisnisman na meri long kantri i wok long gro. Long mekim bisnis em i no isi samting tasol yu ken mekim, gavman i redi long helpim yu.”

Em i tok no olgeta manmeri bai go skul long yuni-versiti na painim wok, tasol dua i op long ol pipel i ken kirapim bisnis na no gat man bai stopim ol.

Mista O'Neill i tok gutpela menesmen na disaplun em bikpela samting long statim liklik bisnis na groim go bikpela.

Mista O'Neill i tokim ol pipel long Sauten Hailans olsem, nau em i taim bilong ol pipel bilong Sauten Hailans i mas senis. Em i tok planti bisnis i mas kamap long Mendi na larim ol turis na ol pipel long arapela provins i kam raun, slip long ol hotel na gest haus long provins.



Nupela Travellers Inn long Mendi.

Ol 6-pela polis bai go trening

OL 6-pela polis opisa i go long Dawin long Australia long Mande insait long dispela polis plesmen program "MekimSenis" namel long Australia Federel Polis (AFP) na Royal Papua Niugini Konstabuleri (RPNGC) olsem long wanpela mun.

Ol 6-pela polis opisa em ol Sinia Konstabuleri na ol Inspekta wantaim tupela polis meri. Ol i makim ol dispela opisa long ol polis stesin long Pot Mosbi, Madang na Maun Hagen.

Asisten Komisina, Alan Scott, i tok ol bai putim ol 6-pela opisa insait long operesenel yunit wantaim ol Noten Teritori stet polis fos long wanem ol i ken gat ol ekspirien na kisim save long ol polis long Australia na yusim ol dispela teknik long kamap 'ejent bilong senis' long PNG.

Dispela polising plesmen i save givim gutpela sans long lainim ol nupela samting na sans long husat i stap insait bai lukim gut ol skil na pasin long sapatim ol developmen gol bilong RPNGC.

Ol i lukluk long polis stesin menesmen, disiplin, profesenelism

na mekim gut ol prektis bilong ol polis. Ol polis long PNG bai kisim wanpela rotesen polisi long lukim ol kain kain polis operesen.

Projek Menesa Inspekta bilong PNG-APP, John McGrath bai go wantaim 6-pela polis opisa long wanpela mun plesmen insait long Noten Teritori.

Taim MekimSenis projek i stat long 2014, Inspekta McGrath i bin kisim olsem 40 RPNGC opisa i go long Australia long trening na em i gutpela long memba bilong RPNGC.

Inspekta McGrath i tok, "Dispela plesmen program i bai givim save long husat i lukim na mipela laik lukim bikpela senis long ol taim ol i stap long hap. Em i wankain long taim ol i kam bek.

Ol 6-pela polis opisa mas pinisim fomal ripot we i soim ol difrens long ol operating sistem long PNG na Noten Teritori Polis sevis. Bihain bai ol i mekim rekomendesen bilong ol RPNGC eksekutiv long lukim.

Inspekta McGrath i tok Mekim Senis program i soim gutpela sain bilong senis we ol i kamap 'ejent bilong senis' long wan wan ples.

Sios bringim bek wanpela gan bilong gavman i lus



Senia Pastor bilong Revival Senta bilong PNG, Pastor Godfrey Wippon i givim bek blok pistol bilong gavman i go long Deputi Komisina Jim Andrews long Polis Hetkota long las wik Fraide.

Poto- David Leo - RPNGC Polis Komyunikesen

Frieda Sila Kana i raitim

REVIVAL Senta PNG Sios Senia Pastor Godfrey Wippon wantaim ol lida bilong sios bilong em sampela husat i stap insait long polis fos i bin go long Polis Hetkota long Konedobu na givim wanpela pistol i go bek long ol polis.

Dispela pistol em i wanpela strongpela gan tru bilong pait we i bilong wanpela gavman dipatmen na em i bin lus long 2003. Dispela gan i bin stap long han bilong ol rong man tasol dispela man husat i bin holim dispela gan i bin senisim laip na i go insait long lotu. Em i bin

givim dispela gan long Pastor Godfrey Wippon na ol lida bilong sios pastaim long em i dai long yia 2012. Em i tok olsem wanpela wokman bilong gavman i bin salim dispela gan long em long K10,000. Ol polis i luksave long dispela gan olsem em i bilong Nesenel Intelijens Opis.

"Polis i wok long mekim wok painimaut yet long wanem kain we dispela strongpela gan bilong gavman i go long han bilong ol rong man," Deputi Polis Komisina, Jim Andrews i tok.

Deputi Komisina Andrews i tok, dispela liklik bung bilong kisim gan

long han bilong sios lida bilong PNG Revival Senta em i bikpela samting.

Dispela blok pistol i bin lus long 2003 i go long han bilong ol rong lain tasol nau i kam bikos long gutpela wok bilong Revival Senta bilong PNG, Senia Pastor Godfrey Wippon na ol lain lidaman bilong en.

Deputi Komisina Andrew i tok moa olsem Gavman bilong nau wantaim polis i wok wantaim ol sios longpela taim nau. Sios i save go pas long opim rot long gavman bai i go insait na mekim wok olsem long ol komyuniti.



Papua Niugini NESENEL AIDENTITI PROJEK



Gutpela bilong yu gat Nesenel ID Kat bilong yu yet



- ▶ Em isi long putim nem bilong pikinini bilong yu long skul.
- ▶ Yu inap kisim helpim bilong gavman long baim skul fi.

"Yu mas Rejista nau na stap insait"

Depatman bilong Nesenel Plening i go pas long dispela



Yangpela meri kamap kepten bilong Air Niugini balus

BEVERLEY Paki, wanpela yangpela meri Enga i kamapim bikipela stori long kamap namba wan meri Papua Niugini aninit long pailot kedet program long kisim mak bilong kepten bilong ranim Air Niugini balus Dash 8.

Long taim Air Niugini i statim pailot kedet program long 1970 i kam, Kepten Paki i namba wan meri long kisim dispela mak .

Kepten Paki em meri Enga na hapkas Morobe i soim kala bilong em long ranim namba wan ron bilong Dash 8 olsem kepten long las mun long Pot Mosbi, na i go long Niu Ailan. Bihain em i go moa long Tokua ples balus long Is Nu Briten pastaim long em i go bek long Pot Mosbi, Jackson's Ples balus, wantaim balus bilong poroman kampani bilong Air Niugini, Link PNG.

Sif Eksekutiv Opisa bilong Air Niugini, Simon Foo i tok amamas long Kepten Pakim na i tok, Air Niugini i putim bikipela mani na ol risos i go long trening bilong ol pailot na ensinia long olgeta yia na kain gutpela wok kamap olsem



Kepten Beverley Paki (namel) i kisim mak bilong kepten bilong balus. Foto: Air Niugini media.

i givim gutpela tingting long bihain bai planti moa meri pailot i go insait long pailot kedet program.

"Air Niugini i givim luksave long Kepten Paki olsem em i kamap gutpela piksa bilong ol meri pailot," em i tok.

Papa bilong Kepten Beverley Pakim em i wanpela Air Niugini pailot tu, Kepten Ted Paki husat i bin kamap kepten bilong Boeing 767 olsem las wok bilong em wantaim Air Niugini pastaim long em i pinis long wok.

Air Niugini nau i gat 50 kedet pailot na Kepten Beverley Paki em i wanpela bilong ol 5-pela meri pailot.

LPNG i gat ol nupela rot long go

Esther Bralyn Wani i raitim

LINK Papua Nigini (LPNG) i gat nupela rot long raun insait long kantri. Dispela nupela rot em long Kiunga i go long Maunt Hagen na Maunt Hagen i konekt go long ol Niugini Ailan.

Komesel na Kago Menesa bilong LPNG, Sheldon D Bwaletto i tok ol pipel i bin askim planti long dispela sevis na nau ol i kamapim ol dispela flait.

Mista Bwaletto i tok LPNG i go long ol ples olsem Is Nu Briten, Wes Nu Briten, Nu Ailan, Milen Be, Westen, Popondeta, Morobe, Is Sepik, Sauten Hailans na Simbu provins.

Em i tok moa olsem ol i go pinis long rurel hap long Losuia insait long Milen Be tasol ol i tingting long go het long Hayfield long Is Sepik, Telefomin long Wes Sepik, Jacquinot Bay long Is Nu Briten na Kandrian long Wes Nu Briten.

Em i tok long mekim ol nupela liklik ples balus long ol rurel hap bai ol i lukim moa pipel insait long dispela hap i kalap long balus.

Long wankain taim, em i tok ol i wok long

wanpela projek long daunim prais bilong tiket, stail bilong tiket, kamapim rot bilong baim tiket long internet na mekim mobail benking.

Mista Bwaletto i tok moa olsem long mekim ol liklik ples balus insait long wan wan provins, ol i laikim helpim bilong ol provinsal gavman long luksave long dispela na givim sampela mani long helpim na developim provins bilong ol.



Poto 1: Link PNG Menesmen Tim: Lephan i go long raithan; Leroy Moha, Menesa bilong Graun Operesen na Airlain Sekyuriti, Helen Lesok, Menesa bilong Kwalati Sefti na Komplaiens, Daniel Wanma, MBE Sif Eksekutiv Opisa, Kepten Roderick Fearon, Menesa bilong Flait Operesen na Sheldon Bwaletto, Menesa bilong Komesel na Kago. Husat i no stap long piksa em, Undam Herath, Menesa bilong Fainens na Edministresen na Benedict Oraka, Mentenens Kontrola.

Poto 2: LPNG Menesmen Tim wantaim wanpela balus bilong ol.

Moa meri i sanap long Bogenvil lleksen

PLANTI MERI long Bogenvil i putim nem long sanap resis insait long ol konstituensi bilong ol long Atonomas Rijon ov Bogenvil Jeneral lleksen dispela yia.

Insait long tupela yia i go pinis, ABC Jeneral lleksen, ol meri i bin lukluk tasol long ol rijnol sit we Bogenvil Haus of Representativ i bin putim bilong ol meri. Namba bilong ol meri we i bin sanap long ol konstituensi i bin aninit long namba 7 tasol.

Tasol nau long dispela wik 8-pela meri insait long Not Bogenvil i bin putim nem long kontes o resis long ol wan

wan konstituensi sit bilong ol. Em i winim namba 7 bilong ol lleksen yia i go pinis.

Nem bilong ol meri husat nau i nominet pinis em Hona Holan bilong Haku konstituensi, Regina Tsikoa bilong Hagogohe, Josephine Getsi bilong Peit, Cecily Kiots Keku bilong Tonsu, Scholastica Miriori bilong Tsitalato, Rachael Vau Tsien bilong Mahari, Agnes Titus long Nissan na Rita Mamavi Pearson long Teop Taonita konstituensi.

Hona Holan em i resis wantaim 21 man kenidet wantaim Cecily Kiots Ketsun husat i resis wantaim ol biknem man olsem Pablik Sevis Minista,

Joel Banam, pastaim memba na vais presiden Ezekiel Joneh Masatt na 10-pela narapela kenidet.

Josephine Getsi i wok long salens wantaim 11-pela ol man long Peit konstituensi. Ol narapela meri i wok long salens wantaim ol man kenident wantaim namba i aninit long 10.

Long Sental Bogenvil, Ismenia Ketsin em i wanpela meri tasol i wok long sanap resis long Saut Nasioi konstituensi. Tasol em i bungim bikpela salens wantaim nau memba John Ken na David Sisito.

Long Saut Bogenvil, i gat

tripela meri kenidet i resis long konstituensi bilong ol. Tupela bilong ol em Miriam Labanue na Mary Mamatau husat i wok long resis long Konnou sit na Joan Nenoari i resis long Bolave sit long Bana.

Namba bilong ol meri kenidet long resis long ol konstituensi sit i soim olsem ol woksop we ol Intenesel Wimen Developmen Ejensi (IWDA) bilong Melbourne, Australia i bin ranim long ol mun i go pinis, i karim gutpela kaikai.

As tingting bilong ol dispela treading em bilong redim ol meri na givim ol moa save long wanem wei ol i ken redi long go insait long lleksen.



Yut, Meri na Famili
Pastor Barbara Lunge

Ol meri i save kilim ol strongpela man

PLANTI pipel i lusim sios na i go bek long pasin bilong graun na laik bilong planti Kristen long lotu em i no moa strong tude.

Buk Baibel i tok osem strong bilong man i save go pinis na dispela taim nau God i save soim strong bilong em. God i save kamapim strong bilong em long ol ol lain i no gat strong. Long 1 Korin 1:27-30 i tok olsem, Pawa bilong God i save kamap ples klia long taim yumi no gat strong.

Hia long graun, ol meri na ol yut i no gat strong long ai bilong ol man bilong graun. Tasol Tok bilong God i tok klia olsem insait long spirit pawa bilong God em i save kamap strong wantaim ol lain i no gat strong long ai bilong man.

Long buk bilong ol Jas sapta 4:4-10 profet meri na jas Deborah i bin go pas long ol pipel bilong Israel taim olgeta i bin lusim God.

Em i bin givim tok oda long Barak long kisim ami bilong Israel long go pait wantiam Komanda Sisera bilong ol lain Kanan. Sisera. Tasol Barak i tokim Deoborah olsem sapos yu no go bai mi no inap long go. Yu go bai mi go.

Nau Profet Jas Deborah i tok orait long go wantaim Barak. Tasol em i tokim em olsem, bikos mi bai go wantaim yu long pait, ona bilong win tude bai no inap yu kisim tasol em bai God i givim i go long han bilong wanpela meri.

Long taim pait i go bikpela tumas na Sisera Komanda bilong ol Kanan i ranawe na hait insait long wanpela haus sel bilong ol Israel, em wanpela meri i kam na karamapim em insait.

Em i givim em susu bilong kau long dring. Em i slip isi tru insait long haus sel bilong em, na meri i kisim hama na nilim em long wisket bilong em na em i dai. Jas 4:17-19.

Ol meri husat i save pait long spirit i gat we bilong bagaramip wok bilong birua ami wantaim king na komanda bilong ol.

Insait long ves 23 na 24, king bilong Kanan i bin dai bilong wanpela meri i kilim em.

Olsem na yumi ol Kristen i mas oltaim pait long win wantaim Jisas na pawa bilong kirap bek bilong em. Yumi stap long sait bilong win olgeta taim.

Toksave: Sapos yu i gat wari, tingting planti, yu mas ringim mi na bai mi helpim yu. Raitim pas long dispela adres na fon namba. Barbara Lunge, ROGIM, P.O. Box 3063. Boroko. NCD. PNG, o ring long 79638276 o salim email long: lungeb37@gmail.com

PNG Insentiv Fan Gren program i go moa

Australia Hai Komisina long Papua Niugini, Mis Deborah Stokes i bin sainim gen wanpela moa hap bilong PNG Insentiv Fan long wok i go yet.

Mis Stokes i bin lonsim dispela Feis 4 bilong PNG Insentiv Fan mani long Boroko Praimeri skul – Salvation Army long las wik. Dispela i makim 14 yia wok bilong Insentiv Fan program, wantaim strongpela stori bilong ol wok kamap insait long kantri.

Stat long yia 2000, Insentiv Fan i bin kirapim ol bikpela wok inap long mak bilong

K350 milien long PNG long helpim wok bilong helt, edukesen, na ol narapela samting long rural eria na i wok strong long kamapim gutpela sindaun bilong ol bikpela meri na ol yangpela gel.

Insait long ol narapela 6-pela yia, Namba 4 hap bilong Insentiv Fan bai givim K160 milien long ol lain husat i save mekim gut wok, we Salvation Army PNG em i wanpela bilong ol. Wantaim mani i kam long Insentiv Fan, Salvation Army i bin wokim toilet blok, pilai graun na opis blok. Sal-

vation Army i bin baim ol laibreri buk long dispela mani.

“Yupela i bin menesim gut tru dispela long namba wan hap bilong program olsem na em i kam bek wantaim wanpela moa proposal long namba tu hap. Namel long 2000 na 2007, ol nupela infrastraksa i kirap long Boroko Praimeri we i lukim moa sumatin , 408 ol gel na 843 boi i kam insait long skul,” Mis Stokes i tok.

Long namba 4 hap bilong Insentiv Fan em i lukluk long ol wok bilong pastaim hap na

tu bai mekim wok strong moa long laip bilong ol meri na ol gel. Em bai askim ol lain husat aplai long kisim fan long wanem kain we ol bai helpim ol yangpela meri na ol mama long wok developmen.

“Planti wok bilong Salvation Army hia long Boroko Praimeri i soim olsem yupela i gat bikpela tingting long helpim ol mama na ol yangpela gel long kamapim gutpela edukesen na long winim mak bilong ol gel long skul insait long Nesenel Kepital Distrik,” em i tok.



Papua Niugini

NESENEL AIDENTITI PROJEK



Oi emu namo totona, Nesinol ID kadi oi abia



Edukesen/ Sikuli

- ▶ Oi emu natuna sikuli lalonai atoa vareai dalana be do ia auka lasi.
- ▶ Gavamani ese oi emu sikuli davana do ia karaia.

“Oi rejista hari bona oi noho lalonai”

Nesenal Plening Dipatment
ese hereva ia mailaia





PIH Saveman *Nias*

"I kam long Pacific International Hospital Port Moresby"

Ph: 311 3000/ Ph: 323 4400 Textline 7155 8866 Website: www.pih.com.pg

Your good germs guy at PIH

For the readers of this newspaper, can you introduce yourself?

My name is Jonathan Oblefias and I am diplomate in Clinical Pathology from the Philippine Society of Pathologists.

Can you describe what a Pathologist can do?

A Pathologist is a specialist doctor who examines tissues, checks the accuracy of laboratory tests and interprets the results in order to help the doctor to treat the patients. We help our fellow doctors solve clinical problems through diagnostic investigations.

Differentiate please in simple terms between a virus and a bacteria?

Viruses and bacteria are found everywhere. A small number of these can infect humans and cause disease. Bacteria can survive inside a living body and outside, while viruses require a living host to survive.

What is a common practice you observe when you go around Moresby which makes you say to yourself "that could be a cause of sickness/illness"?

Please wash your hands before eating, and take a bath everyday. The bacteria that accumulate on the skin can cause sickness, and wound infections. If our food gets contaminated, it can cause diarrhea and stomach pain.

Can you give us a background on HPV infection? Is it true that the human body's defense systems do have a chance to get rid of the HPV? Do all of them cause cervical cancer?

The Human papilloma virus (HPV) is a common virus transmitted through sexual intercourse. There are many different strains of the HPV, some of them can cause health problems like genital warts and cancer. In most cases, HPV infection goes away on its own and does not cause serious health issues. Not all HPV strains can cause cancer

Can a Pap Smear taken outside of Moresby be sent to your lab? How long in such cases before the sample is not useful anymore?

Yes, they can be sent to the lab.

As long as it has been immersed with proper fixative (95% ethanol). There is no time limit as long as it has been adequately fixed and stored properly.

Any other types of tests which people around the country may not realize that they could actually send to PIH lab for analysis?

We have our own immunoanalyzer right now and can perform tests that have been preciously sent abroad for testing:

- Thyroid Function Tests (TFT)
- Prostate Specific Antigen (PSA)
- Toxoplasma IgG/IgM
- Full hepatitis profile (HBsAg, Anti-HBs, Anti-HBc, HBeAg, Anti-HBe)

And very soon, Alpha Feto Protein (AFP)

Lastly, we have recently acquired reagents to test for bacterial antigens in Cerebro-Spinal Fluid (CSF), to screen for meningitis.

When it comes to the HIV, do those who are tested positive for it turn-out to be already in the advance stages?

Those who come out positive are not necessarily in the advanced stages of the disease. It takes many years for our immune system to be affected. Early HIV infections do not have any symptoms at all. This virus slowly attacks your immune system until your body cannot fight common infections anymore. Once the immune system has been destroyed, many common infections that usually do not infect healthy people start to manifest, at this stage it is called AIDS or Acquired Immune Deficiency Syndrome.

Can it be seen under the microscope, the extent of damage to the body's immune systems by HIV?

The damage done by HIV to the immune system cannot be seen through the microscope. The ideal test is to do a CD4/CD8 ratio. A CD4 T-cell count of less than 200 cells/uL, and/or a T cell percentage of less than 15% of total lymphocytes is diagnostic of HIV.

What would you consider as the best brand of basic microscope?

I do not favor any brand of microscope, as long as its durable, has a wide angle of view, and of course, affordable.

What are the things about a patient that can be revealed by a basic blood test?

You can order hundreds of laboratory tests, and will not be able to discuss them in just one page! The more common ones are:

Complete blood count (CBC) can reveal if a person currently has an infection.

Urinalysis can reveal of a person has a Urinary Tract Infection (UTI) Prothrombin time (PT) and Partial Thromboplastin time (PTT) can reveal if a person has a bleeding disorder

Cultures (blood or any other specimen) will be able to detect and Identify infectious agents and its antibiotic sensitivity.

Salmonella Typhi IgG/IgM is a more specific test compared to widal to diagnose Salmonella typhi infections.

You used to practice in the Philippines, and Diabetes is also high in incidence there. When you see blood sugar levels here in PNG, how do they compare with the levels you were once used to in the Philippines? Are they higher? Lower?

Comparing blood glucose levels, it is basically the same, although we get more diabetes screening tests there than here.

Speaking of sweet matters, we heard you were recently married here in Moresby. Is this true?

Yes (^_^)y

What are some "surprise discoveries" that were very much unexpected of a patient when tested at your lab? Are there any cases of a patient being sent for one factor and then the lab shows he/she is afflicted with another different factor?

No single laboratory test is 100% for a certain disease, and symptoms for a disease can vary from one person to another. There have been several cases I have seen of



patients presenting with anemia, and coming in for transfusion. But after looking at several factors I called up the attending doctor to suggest screening for G6PD deficiency. It turned out the patient was G6PD deficient.

Is DNA testing difficult? Do you need specialist technicians you do not have now to run it? Don't you think it is needed here in PNG? Is the machine expensive?

DNA paternity testing is difficult to do, you need special training and equipment for it. Setting up a Genetics lab is expensive, as there are certain building design requirements, specialist technician training and specialized maintenance procedures to be done. The country would greatly benefit to have its own Genetics lab.

What would you as a pathologist prefer a human body to fight: a virus or bacteria?

I prefer to fight bacteria that I know we can see easily. Viruses are stealthy and very difficult to detect.

What line of study should one go through to become a Pathologist?

I was trained in a different environment based on American style learning. If you would want to take up Pathology in the Philippines,

you would need a Bachelor's degree in Science with certain unit requirements. After 4 years of college, you will need to go through four (4) years of medical school, one (1) year of post graduate internship, four (4) more years of subspecialty training in Anatomic and Clinical Pathology.

A common "horror story" is of patients getting confined in the more remote hospitals for extended periods because they are told they have malaria, and then later it turns out they do not. From a lab point of view, how could malaria be diagnosed, and how infallible or foolproof are such diagnosis?

Let me reiterate that no single laboratory test is 100% accurate. The currently available rapid diagnostic kits (Malaria RDT) are accurate in 96-99% of the time, however, the accuracy is lower if the infection is mild (low viremia). The gold standard of diagnosing malaria is through microscopy, but this requires technical training and expertise.

Any shocking discoveries under the microscope you thought you would never get to personally see?

Yes, I put a mosquito that tried to feed on my on a slide and viewed it under the microscope. It was a hair-raising experience!

- Antenatal package
- Labour & delivery package
- Laparoscopic 'keyhole' surgery
- Well woman and baby clinic
- Neonatal intensive care

Get ready to deliver your next baby at the luxurious labor & delivery suite at the new PIH!



3 Mile Hill, Taurama Rd, Port Moresby * Call 311-3000 or 323-4400 or text 7155-8866 or email: pihopd@gmail.com



STORI TASOL wantaim Fr Paul Liwun

No gat haus lotu, no gat Santu Misa

LONG Ista, 2014, taim mi selebretim Santu Misa long Baruni mi bin tokim ol pipel olsem, "Sapos neks yia 2015 taim bilong Ista yupela i no wokim wanpela haus lotu yet, bai mi no inap kam na selebretim Ista wantaim yupela."

Baruni, em i wanpela austesin bilong Sen Michael Peris Hanuabada. Em i sevim Baruni, Tatana, Koukou na Kanudi. I gat moa long 40 krismas nau ol i no gat wanpela liklik haus lotu yet.

Bipo ol i save bung na wokim Santu Misa long wanpela famili haus long Tatana. Tasol dispela famili i gat hevi na ol i muvim i go long Baruni na wokim Santu Misa olgeta Sande aniniti long haus bilong Eddy Colleta inap nau em 34 krismas.

Ol i gridi long ofaim wanpela liklik hap graun bai mipela i ken sanapim haus lotu. Sampela famili long Koukou i ofaim hap graun bilong ol. Tasol manmeri bilong Baruni i no laik bai haus lotu i kamap long Koukou.

Long 15 yia i go pinis, wanpela lain bilong Baruni i givim wanpela hap graun nogut klostu long solwara. I gat graun malumalu long en.

Ol i askim ol Katolik manmeri i pulapim dispela hap na mekim i drai, bai ol i ken sanapim wanpela haus Lotu.

Taim Pater Paul Guy i bin Peris Pries long Hanuabada, ol i bin wokim planti miting na planti toktok. Tasol i no gat eksen olsem na inap nau hap graun ol i no pulapim yet.

Taim mi kamap peris pris long yia 2010, mi stat long muvim ol bai ol i ken stat long mekim wok. Inap tude i no gat wanpela i muv yet. Olsem na long Ista las yia mi bin tokim ol, sapos i no gat haus lotu, bai i no gat Ista selebren long Baruni. Bihain long mi wokim dispela tok save, i no gat muvmen bilong mekim wok inap nau.

Long stat bilong taim bilong Len, mi tokim ol gen long yusim pawa bilong ol (men power) long wokim wanpela wok penans long stretim dispela hap graun we ol bai sanapim haus lotu. Inap long Ista, i no gat wanpela man o meri i bin mekim wok o rispon long toktok bilong mi.

Olsem na long Pam Sande mi tokim ol gen, bai no gat Holi Wik selebren long Baruni. Tasol mi sori long ol na mi tokim ol, "Bai mi kam wokim Santu Misa long Ista Sande tasol."

Mi tu tokim ol gen "sapos inap long krismas, haus lotu i no kamap yet, no gat krismas selebren bai kamap long Baruni."

Planti bilong ol i kros na tok, bilong wanem mi no laik kam wokim lotu long Holi Wik. Ol i belhat na tok nogut long mi. Manmeri i wokim dispela toktok em ol lida bilong ol, husat i tok, "Ol i save harim tok, tasol i no bihainim."

Long Ista Sande bihain long Santu Misa mi tokim ol gen: "Yupela manmeri bilong Baruni, yupela i les manmeri. Yupela i les long wokim wok. Yupela i laik sindaun na kisim tasol. Olsem nau yupela i sindaun na wetim bai wanpela haus lotu bai pundaun long heven na i sanap na yupela kam na wokim lotu. Yupela i bin prea planti taim tumas, na yupela i lusim tingting long mekim wok. Prea bilong yu bai kamap ples klia sapos yu sapotim wantaim wok."

Mi tokim yupela bai no gat Misa, bilong skulim yupela. Tasol yupela i no laik lainim na difendim yupela yet olsem yupela i rait olgeta. Mi Peris pris bilong yupela. Mi kamap papa bilong yupela olgeta. Nau mi salensim yupela papa mama.....sapos yupela askim wanpela pikinini bilong yupela i wokim sampela wok, na em i no laik harim tok bilong yupela na i no wokim wanem samting yupela i askim.....bai yu pilim wanem?

Wanem samting yupela i pilim, nau mi yet i pilim long en. Sapos yupela i stap bikhet olsem, no gat wanpela gutpela samting bai kamap long Baruni austesin."

siosnius

Ol yangpela lida i mas go pas long sios

...Wok bung wantaim na kamapim senis

Sanang Sazoring- Luteran Komyunikesen i raitim

OLPELA presiden bilong ELCPNG Kainantu distrik, Reveren Fuakac Frisu i tok taim i kam pinis long yangpela lida i mas go pas long sios bilong God.

Em i tenkyu long ol sios lida na ol meri husat i sapotim em long mekim wok lida insait long tem bilong en long opis olsem lida bilong ELCPNG Kainantu distrik.

Reveren Frisu i tok wok bilong sios i kamap hat long planti taim long wanem, yumi ol lida i no kam bung wantaim long mekim dispela wok sios na taim bilong senis i kamap pinis.

Olsem ol lida, yumi mas

mekim gut wok bilong yumi long tilim Gutnius bilong Jisas Krai insait long Kainantu, em i tok.

Nupela presiden bilong ELCPNG Kainantu distrik, Rev. Sailas Bemeng i tok olgeta wokman na meri bilong dispela sios i mas wok bung wantaim long gutpela bilong Gutnius.

Em i tenkyu long ol lain husat i wanbel long wok bung wantaim em na makim em olsem lida long go pas long Luteran sios insait long Kainantu distrik.

Ol 7-pela seket bilong ELCPNG Kainantu distrik olsem Raipinka, Kainantu taun seket, Ona, Tenta, Ponampa, Finintugu and Rihona seket olgeta i bin bung long Sen

James Luteran sios long soim laik na sapot bilong ol long nupela lida bilong sios distrik.

Reveren Eric Punde, tisa bilong Balob Tisa Koles insait long Lae, i autim wanpela strongpela Tok bilong God.

Reveren Punde i strongim tok em i autim wantaim tok bilong Dokta Martin Luther husat i bin mekim dispela tok long taim bilong en olsem; "Mi bin lukim marimari bilong God insait long Krai Jisas long rot bilong bilip tasol.

Mi kamap stretpela long bilip tasol insait long Pikinini bilong em Jisas Krai Bikpela bilong mi," Luther i bin tok.

Reveren Punde i tok long ol Luteran olsem, "Yumi mas harim Tok bilong God. Long wanem, wanpela maus insait

long Heven em i tok, dispela em i Pikinini tru bilong mi na mi laikim em tumas. Yupela olgeta i mas harim tok bilong em," Mak 11:1-11.

"I no gat tubel – yumi bai go long Heven! Long wanem, yumi i no sem long harim Tok bilong God. Yumi no sem long lotu long God na bilip long Gutnius i bin kisim yumi bek insait long wok bilong Krai Jisas," Rev. Punde i tok.

Long pinisim tok, Reveren Punde i tokim ol sios wokman na lida long i no ken sem long autim Tok bilong God na tokaut long marimari bilong God na sori bilong God insait long Jisas Krai. Yumi kisim gutpela na trupela laip insait long Jisas Krai tasol.

Luteran Sios Kainantu soim mak bilong senis

Sanang Sazoring- Luteran Komyunikesen- i raitim

WANPELA bung bilong ol sios lida ol i bin holim long taim bilong instalesen sevis i soim gutpela sain bilong ol Luteran insait long Kainantu distrik.

Sios i putim Reveren Sailas Bemeng long wok olsem nupela presiden bilong Evangelikal Luteran Sios (ELC/PNG) Kainantu distrik, long go pas long sios long narapela 5 yia i kam.

Sios i makim tu Reveren Patori Sokewe olsem nupela Gutnius Dairekta, na Philemon Jofi olsem nupela yut dairekta.

Klostu 1,000 Kristen manmeri i bin bung long Sen James Luteran Sios long soim sapot bilong ol long lukim ol nupela sios lida i kisim wok na go pas long sios.

Reveren Bisop Zau Rapa, Asisten Het Bisop bilong ELCPNG i bin mekim instalesen sevis bilong putim ol lida long wok long karim sios i go long narapela 5 yia.

Em i singaut i go long olgeta sios wokman na lida long wok bung wantaim na mekim sios wok na go pas long ol Kristen manmeri na autim Gutnius bilong Jisas Krai.

"Yupela kirap na singim Gutnius na kamapim kala insait long wok Gutnius bilong yupela," em i tok.

"Yupela i no ken mekim pasin bilong tok baksait na jeles long wanpela arapela. Dispela pasin bai kamapim bruk insait long sios. Yupela i mas pre na helpim wanpela na arapela na dispela bai kirapim wok Gutnius i go het, na Luteran Sios bai sanap strong long wok bilong en," em i tok.

Long wanem, pawa sios i givim ol lida em i no bilong ol wan wan man, tasol em i olsem kangal na namba ol i givim wanpela man, rausim



Nupela Distrik Presiden Rev Sailas Bemeng na siaman bilong instalesen na oganaising komiti Nathaniel Soata.

na givim narapela man. Bikos pawa i stap long ol pipel na God yet i stap wantaim bung bilong man i holi na strongim dispela wok na makim wan wan man namel long planti lain long mekim wok bilong God.

Nesenel sios seketeri bilong ELCPNG, Albelt Tokave, i tok strong long olgeta lida na Kristen manmeri i mas

stap insait long pasin bilong wanbel na bringim Luteran Sios insait long Kainantu i kam bek long posisen bilong en.

"Yupela i mas wok bung wantaim na mekim wok bilong autim Gutnius i mas stap klia long stretpela pasin bilong en. Yupela larim ol pikinini bilong yupela i raun long strit na kaikai ol pipia

kaikai – em i min olsem, pasin bilong lida tasol i mekim na ol Luteran pikinini i no kisim marimari bilong God i kam long Krai ol i autim," em i tok.

"Taim yupela i mekim olsem, bai yupela i lukim strong na pawa bilong Gutnius na kaikai bilong dispela wok bai lait insait long ol manmeri," Mista Tokave i tok.

Pipel i kamapim sios bilong God

Sanang Sazoring- Luteran Komyunikesen- i raitim

"DISPELA sios i mas sanap gen na wokabaut bihainim Tok bilong God insait long 2015.

"Na sios em ol bilip manmeri i karim na wokabaut. Olsem na mipela oganaising komiti i tok tenkyu long ol bilip manmeri insait long Kainantu distrik," presiden bilong Raipinka seket, Nathaniel Soata i tok.


Mista Soata i tok ol sios lida i gat kros na bel hevi namel long ol yet, tasol ol bilip manmeri i sanap yet na ol tasol i mekim na sios i gat kala, i gat strong na mekim sios i muv long soim olsem Luteran Sios em i sanap yet long

Tok tru bilong God na nem bilong sios i no bagarap.

"Em i disisen bilong bung bilong man i holi na mipela i no gat tok. Ol yet i laikim senis i mas kamap na Gutnius i mas sanap strong na go. Em i soim olsem, wanem tingting na laik bilong ol bilip manmeri i kamap ples klia na ol yet i kisim amamas na belisi insait long pasin bilong ol.

"Mipela oganaising komiti tu i tenkyu long wok bung na wanbel bilong ol lida, olupela na nupela long wok i kamap gut. Dispela em i sain bilong sios i kisim bek strong bilong en insait long Tok bilong God na em bai ran gut long helpim olgeta Kristen insait long ELC Kainantu distrik.

Korapsen i wok long kilim gutpela sindaun bilong bihain taim



Jada 015

Long las mun, planti skul long kantri i tokaut olsem bai ol i pas sapos ol i no kisim olgeta mani bilong skul aninit long Tuisen Fri Fi (TFF) polisi bilong gavman. Ol i tok namba bilong ol pikinini i winim mak bilong mani gavman i givim long taim skul i stat na mani i sot long ranim skul long taim namba tu skul tem i stat.

Nau yumi harim olsem long dispela bikpela mani gavman i givimaut long ol skul, bikpela hap i lus long rot bikos mani i go long ol gi-aman skul. Ripot i tok K6.9 milien i bin go long 5,218 skul na 7,000 tisa na 400,000 studen, tasol dispela em ol giaman namba bilong skul, tisa na studen. Dispela mani i bilong 2013 na 2014. Long 2013 ol i kisim K3.1 milien na K3.8 milien long 2014.

Gavman i painimaut long dispela stil pasin bihain long komiti bilong sekap long ol skul i kisim ripot i kam long ol distrik long namba bilong ol skul. Namba bilong ol skul na studen na tisa dispela komiti i kisim i no wankain olsem namba i kam long Edukesen Dipatmen. Em i soim ples klia olsem bikpela hap mani tru i paul long rot.

Long dispela wik, gavman i putim strongpela tok save i go aut long olgeta provins i mas salim ripot namba bilong ol skul na tisa na studen na bai wok painimaut i ken kamap long dispela bikpela hevi. Sif Seketeri bilong gavman i tok ol provinsal edministreta i mas salim dispela ripot i kam long opis bilong em bipo long Epril 21. Em i makim tripela opisa long go pas long mekim dispela wok long nem bilong gavman.

Gavman i lusim samting olsem

K1 bilien long fri edukesen long las yia na dispela yia. Na sapos i tru olsem sampela lain i wok long paulim mani, orait, painim ol dispela lain na kotim ol.

Wanpela bikpela wok ol bai mekim em long painimaut olsem wanem ol i save skelim mani i go long ol skul bihain long gavman i givimaut dispela mani bilong TFF. Dispela wok bai i no isi bikos planti skul na provins i no gat gutpela rot bilong putim ripot bilong mani ol i kisim na we ol i spendim. Planti skul tu i no gat akaun o skul akaun bilong ol i pas pinis na mani i go long praivet akaun bilong wanpela het tisa o siaman bilong skul bot o i stap long provinsal opis.

Dispela pasin bilong paulim mani bilong ol skul i mas opim ai bilong gavman long luksave olsem sistem bilong tilim mani i go long ol skul i no wok gut.

Gavman na ol han dipatmen bilong en i mas stretim gut sistem pastaim na bihain ol i ken skelim mani i go long ol skul. I gutpela tu long givim sampela trening long ol lain i mekim wok bilong skelim mani i go long wan wan skul na givim ripot i go bek long Edukesen Dipatmen long provins na long het opis long Mosbi. Olgeta dispela samting i no wok gut olsem na mani bai i paul yet sapos i no gat wanpela samting i kamap long stretim nau.

Yumi hop olsem bihain long komiti bilong Sif Seketeri i givim ripot bilong ol, bai gavman i stretim ol dispela kain hevi na banisim gut mani bilong ol pikinini bilong PNG.

Dispela pasin bilong stilim mani long gavman i kamap bikpela tru long PNG. Olgeta de i gat ripot i kamap long ol lain i stilim mani gavman i makim long bringim sevis i go long pipel.

Yumi lukim dispela pasin i kamap long ol bikpela gavman opis long Mosbi, ol provinsal senta i go daun long ol liklik distrik na i go yet. I tru yumi gat ol polis na spesel investigesen tim bilong painim ol dispela kain lain na

bringim ol i go long ai bilong kot.

Tasol korapsen em i olsem wanpela bikpela urita. I gat planti han bilong en. Long taim yu katim na rausim wanpela han, narapela bai kisim ples. Em inap long subim han bilong en i go longwe tru long painim kaikai. PNG i wanpela isi ples bilong stilim pablik mani bikos planti lain i save pasim tok na stilim pablik mani, i no wanpela man o meri tasol i mekim dispela kain pasin.

Tasol i gat planti moa stretpela manmeri stap. Sapos olgeta yet i opim maus na tok nogat long korapsen, bai yumi lukim sampela gutpela senis i kamap long kantri bilong yumi.

PM i Tok TFF bai go stret long skul akaun

PRAIM Minista Peter O'Neill i tok olgeta elementri, praimer, na haiskul bai kisim fri edukesen mani stat long dispela wik.

Praim Minista O'Neill i mekim dispela toktok bihain long planti komplek i kamap long ol skul long kantri olsem ol i no kisim fri edukesen mani na bai ol i pasim skul. Sampela i tok ol i no kisim yet.

Gavman long las wik Fraide i givim K90 milien long baim na pinism mani bilong tupela tem bilong 2015 aninit long fri edukesen polisi bilong O'Neill gavman.

Mista O'Neill i tok fri edukesen em bikpela polisi bilong gavman na em bin tokim olgeta papamama na ol skul long kantri olsem gavman i bai baim olgeta fi na olgeta pikinini i mas go long dul.

Em i tok em i les long harim olsem ol skul i no kisim mani na i laik pasim skul. Em i tok sapos wanpela opis bilong gavman i no mekim gut wok

na i pasim mani o kamapim paul pasin, bai ol i kisim taim.

Praim Minista i givim daireksen gen long dipatmen long kwiktaim salim mani i go stret long akaun bilong wan wan skul na bai skul i ken stat gut long tem 2.

Dispela i kamap bihain long wanpela wok painim i kamap we Sif Seketeri, Manasupe

Zurenuoc i tok long en long painimaut wanem rot Edukesen Dipatmen i yusim K1 bilien fri edukesen mani long las tupela yia.

Dispela i tim i mekim wok painimaut long lukim wanem rot mani i go na bilong wanem as sampela skul i no kisim ful mani o i no kisim yet. Ripot bilong ol bai helpim gavman

long salim mani stret i go long ol skul.

Mista O'Neill i tok gavman i putim bikpela mani pinis na olgeta skul bai go het long tem 2 na wankain bai kamap long tem 3 na 4.

Praim Minista i tok olgeta skul bai kisim mani bilong fri edukesen na no gat skul bai pas long dispela yia

Namah i gat sas long bekim:OC

MEMBA bilong Vanimo Green, Belden Namah i lukim Obudsmen Komisnin (OC) i salim em i go long Pablik Prosekuta long em i ken sanap long lidasip traibunel kot.

Sif Obudsmen, Rigo Lua na Obudsmen Phoebe Sangetari long wanpela stetmen i tok OC i mekim wok painim long opis bilong Mista Namah i soim olsem em i no bihainim Lidasip Kod aninit long seksen 27 bilong konstitusen aninit long ogensk lo bilong ol lida bilong duti na risponsebiliti bilong lidasip.

OC i tok i gat evidens long wok painim olsem Mista Namah i no bihainim gut lo i banisim wok bilong lidasip long kantri.

Pablik Prosekuta bai glasim ol evidens bilong OC na tokaut sapos em bai salim Mista Namah i go long Traibunel kot o nogat

OC i tok namba bilong ol lida husat i gat sas em moa long 300 na namba i wok long gro yet. Planti memba bilong palamen i gat sas na OC i ok long salim i go long opis bilong Pablik Prosekuta long glasim keis bilong ol.

Sampela i stap long lista bilong sanap long Lidasip Traibunel.

Memba bilong Manus Ronney Knight em traibunel i painim em i asua na bai klostu ol i tokaut long wanem kain mekim save em bai kisim.

Stori bilong tumbuna

Tragao pinisim ol Pikinini

Bipo tru wanpela bikpela Tragao i wokim haus antap long wanpela bikpela diwai long maunten. Olgeta de em i bin plai i go long ples na kisim ol pikinini i kam na kaikaim ol.

Long wanpela de wanpela yangpela meri i go long gaden na katim banana i stap na wanpela Binen i kaikaim em long bel bilong en.

Sampela de i go pinis meri ya i gat bel na em i karim pikinini man. Mama bilong em i save was gut na Tragao i no nap bagarapim.

Taim pikinini i kamap bikpela, mama i stori long em long Tragao i pinisim olgeta pikinini. Boi i harim dispela na bel hat na tokim mama olsem. "Redim tupela skin diwai bilong karamapim bodi bilong mi na mi go sanap long gaden na mi traime." Na Tragao i kam karim i go long haus bilong em long apinun tru. Na i no kilim em long wanem, olupela i stap yet.

Long biknait birua ya i slip dai i stap na boi ya i kirap na katim nek bilong em na em i dai.

Long nait yet ol i paitim mambu na garamut, na ol man-meri i stap hait i harim na kam long bung na amamas.

Dispela em i stori nating, tasol i makim stret Gut Nius.

Tragao - Satan; Yangpela meri - Maria; Binen - Holi Spirit; Pikinini Man - Jisas

Dispela stori kam long Raikos Distrik - Madang

Stori i salim Maningne Wedong long Maweroro Vilis Raikos Distrik - Madang Provins



Pik kamap long Karkar

Bipo tru 2-pela man i stap long ples Gial insait long Karkar Ailan.

Nem bilong tupela, Bega na Muri, Wanpela taim pren bilong tupela i stap long narapela sait long Ailan i salim tok i kam long tupela i mas i go long wanpela pati bilong em.

Tupela i kirap i go wokabaut lusim

4-pela de na nait long rot na i go kamap long ples.

Pren bilong tupela i kam na kisim tupela i go insait long pait. Insait long pati planti

pipel i mekim tok gris na pilaipilai na pani, olsem ol i amamas.

Taim ol i tilim kaikai ol i lusim tingting long givim wanpela dis kaikai long Bega.

Pati i pinis Muri na Boga i go bek long pies bilong tupela. Tupela i wokabaut long rot Bega i hangre, em i askim Muri long givim em sampela kaikai. Tasol Muri i no laik givim sampela kaikai long Bega.

Long rot Muri i go pekpek long bus.

Taim Muri i kam bek long rot Bega i go insait na i kaikai pekpek bilong Muri.

Muri i lukim na i tok long Bega, pren ya no ken kaikai pekpek. Bega i tok, tasol taim mi askim ya long kaikai na ya no givim mi. Taim Boga i tok olsem nan em i tanim i go olsem pik.

Tupela i kamap pinis long ples Muri i singautim Sega long go antap lang haus, tasol bega i go aninit long haus na slip.

Ol pik long Karkar Ailan i kamap olsem.

H.G, Mowan, Karkar Ailan, Madang.Provins

Raun wantaim Wantok kru ...

Wara Magani save mekim laip long Mendi

Nicky Bernard i raitim

WARA Magani long Mendi em wanpela we save pulim planti ol liklik ples long Mendi long go maket long en.

Dispela wara i kol stret na planti manmeri long Mendi save kam na waswas long en bipo ol go raun long liklik taun bilong Mendi.

Wara Magani i gat maket ples long en long sait bilong wara tasol, em gat bas stop tu bilong ol PMV long ran go long ol liklik ples insait long Mendi.

Wara Magani tu i stap namel stret long Mendi na planti manmeri long Mendi save raun go sindaun long sait bilong em long kisim gutpela kol win.

Ol PMV na ol kar tu laik waswas i gat ples bilong tu long wasim. Planti ol pikinini save wetim tasol ol kar o PMV long wasim long kisim liklik toea bilong ol.

Augustine Emil, i singsing pinis long dispela wara na dispela singsing bilong em i tru yet. Sapos ya pilim kol bilong en bai ya lus tingting long go long wanem hap ya kam long en.



Wanpela mama i salim ol prut bilong em long sait bilong wara Magani long Mendi. Poto Nicky Bernard.

YUMI FM redi long Awod nait

YUMI FM redio stesen i redi nau long bikpela nait bilong ol long givim luksave i go long wan wan singa long musik na singsing bilong ol we i save pairap long redio stesen bilong ol.

Yumi FM i kirapim dispela luksave long ol musik manmeri long strongim musik bilong yumi PNG na Pasifik Ailan. Planti bilong ol musik manmeri i bin kisim luksave i kam long Yumi FM taim em statim dispela musik awod long 10-pela yia i go pinis.

Dispela yia, Yumi FM i stap strong yet long luksave long musik manmeri bilong PNG na Pasifik Ailan long namba 11 yia bilong dispela awod.

Planti bilong ol musik manmeri bai kisim luksave em long singsing bilong ol i wok long pairap long Yumi FM redio stesen na tu ol rikwes ol manmeri salim go Yumi FM long harim feveret singsing bilong ol.

Yumi FM save mekim kaun daun bilong 20 hatpela singsing ol manmeri i save laikim long olgeta Sarere na long pinis bilong yia ol save kauntim 100 singsing. Dispela ol singsing save go insait long resis na ol manmeri yet save makim singsing ol laikim.

Long dispela Sarere bai lukim planti ol nupela musik manmeri husat singsing bilong ol i bin hat tru long redia stesen bilong Yumi FM na dispela ol manmeri bai kisim luksave.

Yumi FM tu i kamapim wanpela awod long givim long ol opela ben na musik manmeri husat bin strong musik bilong yumi PNG long bipo. Kain olsem Brike, Quakes, Azzimbah, Buruka Tau na sampela moa. Dispela yia ol luksave long Tom Lari, musik man bilong Hailans musik bilong em bin hat na strongim bipo.

Yumi FM tu i no save lus tingting long ol Pasifik Ailan bilong yumi, ol save skelim ol singsing bilong Pasifik Ailan we singsing bilong ol save kamap klostu klostu long redio stesen bilong ol.

Dispela Sarere bai wanpela bikpela nait bilong ol musik manmeri bilong yumi na Yumi FM. Planti ben na ol musik manmeri bilong yumi husat bai kisim Awod bai singsing tu long dispela nait.

Lamana Gold Club bai lukim dispela nait wantaim sapot bilong Next Of Kin, Total Event, sista redio bilong Yumi FM, Nau FM, Legend FM na bikpela sponsa TVWAN.

Ol biknem musik man olsem Tom Lari, Anslom, Danie Bilip na planti ol yangpela musik manmeri bai singsing long dispela nait.

Wantok Niuspepa bai ranim ol piksa bilong ol musik manmeri husat i winim awod long narapela wik.

11th 93FM YUMI FM PNG MUSIK AWARDS 2015 with tvwan Saturday 18th April 2015 THE GOLD CLUB Tickets: Arena K100, Balcony K200 Sold at the Lamana Hotel Reception

Choke Band, Sharon Geli, Anslom, Stagajah, Tom Lari, Jokema, Daniel Bilip & from PNG & S.I, Jagarizzar & Yung Yanny

TOKSAVE:


WANTOK i askim ol gutpela rida bilong em long salim ol tumbuna stori i kam na bai mipela i putim long niuspepa. Sapos stori bilong ya i gutpela na mipela i putim long niuspepa, bai ya winim **K50** we mipela bai salim i go long akaun bilong ya, o salim mobail yunit inap long **K50** i kam long fon bilong ya.

Salim nem, edres na mobail namba bilong ya wantaim stori i kam long dispela edres:

Stori Tumbuna, Wantok Niuspepa, CI-Word Publishing Company, P O Box 1982, BOROKO, NCD, PNG o email edres: editorial@wantok.com.pg Telepon namba: 3252500. Tenkyu

Em nau! Ol pikinini i ken painim rot i go long ples wantaim Wantok kru...

Sudoku



4								8
	5	3			4			9
1			9		7			
		6		7			4	5
5				1				7
8	7			6		2		
			2	6				4
	8		1			3	2	
	4							8


					3		6	2
6		3	7			8		
	9	5	8		4			
	2	8		4				7
	7			9				5
1				8		4	2	
			4		8	6	3	
		1			5	2		4
3	4		6					

Ansa bilong Sudoku # 93 na # 94 neks isu


1	6	7	5	8	4	9	3	2
3	4	9	1	2	7	6	8	5
2	8	5	6	3	9	7	1	4
5	3	8	9	6	1	2	4	7
9	2	4	3	7	5	1	6	8
7	1	6	2	4	8	5	9	3
6	5	2	8	1	3	4	7	9
8	7	1	4	9	2	3	5	6
4	9	3	7	5	6	8	2	1

8	4	1	7	9	2	3	5	6
7	9	5	6	8	3	1	4	2
2	3	6	5	1	4	7	8	9
3	7	8	9	2	1	4	6	5
4	5	2	8	3	6	9	1	7
6	1	9	4	7	5	8	2	3
9	2	4	1	5	7	6	3	8
1	8	3	2	6	9	5	7	4
5	6	7	3	4	8	2	9	1

Ansa bilong las wik Sudoku # 91 na # 92



EM ORAIT



EM NOGUT

Ol wod lista hia:

- ADORIM
- ANINIT
- BALUS
- DAUNBILO
- EVANGELIO
- FIT
- GRAUN
- HANGAMAP
- IVNING
- JANUERI
- KALABUS
- LAPLAP
- MALOLO
- MASKI
- NARAKAIN
- OLGETA
- PAIRAP
- PANISIM
- PIKININI
- RAKSAK
- SALIM
- TAMBUIM
- ULA
- WANBLUT
- YESA

G O U M A S K I E A L L P I T U R D O X
 E C L T A A P V Y M U P Z G Y G R A U N
 E C A G X N A N E S T I O T A M B U I M
 E J S C E I I I S V H K R T T W O N W P
 S J T X L T M N A E A I O I N W G B A O
 T E Z X A E A G I E N N A R A K A I N N
 R E N R W D L K P T G I G E S G A L B C
 T P K P U E O A A O A N S E C O C O L G
 K P H D C E L R N L M I F G L M T S U E
 A D S S G P O C I J A N U E R I F S T Z
 G R Y N A E K S S M P B R O F K O T R E
 U K T L D L U I I B P G U M A N R E U J
 K G U S I L I P M E R J I S F T A I V N
 M E I X A H R M A O N H K S I M M D D D
 S S S B S H S R R I R A S H G D S L U A
 T Z S Z O L S P I T R E M H S S A O X E
 T D B O N R M N I I R A W E J P E A E C
 S J I P A E Y H Z U F T P H S E O A P E
 I O D M G M G E B D A W P S C D Y O C L
 O T T M I H Z E O R F D T P L I H R A B

Ansa bilong Wod Pilai isu 2117



Oi Raun Nabaut Poto



CBC AGM: Bisop ilek bilong Wawak Daiosis, Joseph Roszynski SVD i toktok wantaim Bisop Rochus Tatamai bilong Bereina Daiosis. Poto: Nicky Bernard



Yangpela mangi Mendi i amamas long bilas bilong ples bilong em. Poto: Nicky Bernard



Oi pikinini bilong Eurupe Danis grup long Siassi Ailan i holim baton. Poto: MadNESS Photography



Oi skul sumatin bilong Nu Ailan. Poto: ABC

Oi skul long PNG i sot long mani

Sampela het tisa bilong ol skul long Papua Niugini i tokaut pinis olsem skul bilong ol bai no inap stat long namba tu skul tem bikos ol i sot long mani.

Ugwalubu Mowana Jeneral Seketeri bilong Papua Niugini Tisa Asosiesen i askim strong gavman long givim mani mani nau bikos namba tu skul tem bai stat long 20 Epril.

Mista Mowana i tok ol het tisa long sampela skul i tokim em pinis olsem skul bilong ol bai no inap stat long wanem ol i no gat mani.

Em i tok maski gavman i statim wok painimaut long mani bilong ol skul, em i mas givim mani long lukim olsem ol skul i gat mani long mekim wok bilong skulim ol pikinini.

Mista Mowana i tok gavman i tok em i givim pinis K300 milien long moa long K600 milien baset bilong ol skul.

Honiara siti i klin moa

Bikpela siti bilong Solomon Ailan, Honiara nau i luk klin moa winim ol arapela yia.

Deputi Meya bilong Honiara, Eddie Ngava i Honiara i kamap klin bihain long Honiara Siti Kaunsil i putim wanpela lo long olgeta haus na bisnis long siti i mas klinim ples i go inap long 7-pela mita long eria bilong ol.

Deputi Meya Ngava i tok ol papa bilong bisnis o haus bai ken baim \$10,000 fain sapos ol i no bihainim dispela lo.

Mista Ngava i tok pipel i save lukim Honiara long bipo olsem wanpela ples i save gat planti pipia nabaut.

Tasol em i tok Honiara nau i luk klin tru bihain long ol i statim dispela 7-metre by-law long mun Februari.

PNG Difens Fos i statim bek gen Delta na Charlie Kampani

Papua Niugini Difens Fos bai statim bek gen tupela Kompani we ol i bin pinisim sampela yia i go pinis.

PNG Difens Fos Sif ov Staf, Kenel Mark Goina i tok ol i bin pinisim dispela tupela kampani bihainim tingting bilong gavman long katim daun sais bilong Difens Fos.

Tasol Delta Kampani i stat gen long Trinde long dispela wik.

Em it ok bai ol i kirapim Charlie Kampani long pinis bilong mun Epril o long mun Me.

Em i tok ol i statim gen dispela tupela PNGDF kampani we i bihainim plen bilong Difens Fos White Paper we namba bilong ol soldia bai go antap long mak bilong 5,000 long 2017.

Nu Silan i helpim ol woka bilong Vanuatu

Vanuatu gavman i amamas long gavman bilong Nu Silan i givim bikpela helpim i go long ol sisonel woka bilong Vanuatu long wok long ol fam long Nu Silan olsem hap long help bilong en bihain long Saiklon Pam i bagarapim Vanuatu.

ABC nius i bin kisim dispela stori.

Komisina bilong Leba long Vanuatu Lionel Kaluat i tok tenkyu long gavman bilong Nu Silan long helpim ol bihain long ol bikpla hevi Saiklon Pam i bin kamapim long kantri.

Lionel Kaluat i mekim dispela toktok bihain long gavman bilong Nu Silan i bin tokaut long dispela wik olsem em bai no inap kisim ol woka bilong ol narapela kantri long kisim ples bilong ol Ni-Vanutu husat i bin lusim wok na go bek long ples bihain long saiklon.

Moa long 2,000 tausen ol

wokman na meri bilong Vanuatu i save wok long hortikalsa indastri long Nu Silan.

Gavman bilong Nu Silan i tokaut tu olsem bai ol i no inap sasim ol pipel long baim visa sapos ol i go long Vanuatu na bihain i laik go bek long Nu Silan.

Solomon Ailan LCC i painim ol korap lida

Maski em i no gat inap mani na risosis, Lidasip Kod Komisn (LCC) bilong Solomon Ailan i wok strong long lukim olsem ol politisen na gavman opisa long kantri i bihainim ol gutpela pasin bilong ol lida aninit long lo.

Francis Luza, Siaman bilong Solomon Ailan Lidasip Kod Komisn i toktok wantaim ABC nius long wok bilong LCC.

Mista Luza i tok dispela wok em i no isi long wanem mani long baset i no inap long LCC i mekim gut ol wok bilong en.

Mista Luza i tok ol i nidim mani long ol investigeta i ken go tu long olgeta hap bilong kantri long painimaut sampela mani ol i save misyusim long sampela projek.

Mista Luza i tok planti long ol keis ol i wok long investigetim em long sait bilong mani.

Em i tok wok bilong Lidasip Kod Komisn em long investigetim ol politisen long nesanel na provinsal gavman, na tu ol gavman opisa.

PNG etlit i stap insait long Osenia developmen skwad

Papua Niugini i makim tupela yangpela man long joinim Osenia Traiatlon Yunion (OTU) developmen skwad.

Polehau Popelau bilong PNG na Marianne Elkington bilong Cairns bai go long 3rd Pacific Triathlon

Championship.

Stephen Damien, PNG Triathlon Union developmen opisa i toktok wantaim ABC nius long dispela.

Mista Damien i tok lain bilong Oceania Triathlon Union (OTU) em i wanpela kain bikpela lain we em i save helpim ol yangpela pipel long spot bilong triatlon long ol kantri long Pasifik.

Traiatlon em i wanpela kain spot we ol pipel i mas swim long solwara, bihain ol i mas ran long wilwil na bihain ol i mas ran long wanpela resis i go winim mak.

Dispela tupela yangpela man i bilong Wewak long Is Sepik provins na tupelo bai joinim ol narapela yangpela etlit bilong Solomon Ailan na Fiji long trening wantaim Oceania Triathlon Union.

Mista Damien, i tok wanpela driman bilong OTU em long developim ol etlit long rijon long ol i ken resis long olimpik level.

ABG ileksen bai orait

Wanpela sinia niusman long Bogenvi husat i bin ripot long olgeta ileksen long Atonomos Rijon bilong Bogenvil i tok, i luk olsem ileksen long mun Me bai kamap orait na no gat trabel bai kamap long en.

Aloysius Laukai, jenelis na menesa bilong New Dawn FM long Buka i toktok wantaim ABC nius long dispela.

Laukai i tok dispela em long wanem olgeta sait wantaim long Bogenvil Konflik i wanbel long reis long ileksen we bai stat long Me 11.

Em i tok Limited Preferential Voting or LPV sistim i mekim ol kendidet i gohet long wokbung long kempen bilong ol.

Laukai i tok kempen long ABG ileksen i go het gut nau, na em i no ting bai gat hevi long sait long sekyuriti long taim bilong vot.

Yu ken kamap miliena

...Setim gol, bikpela tingting, stat liklik

Stanley Nondol i raitim

DISPELA em wanpela bilong 10-pela step bilong yu long wokim bisnis na kamap miliena. Sif Eksekutiv Opisa (CEO) bilong Nesenel Developmen Benk invesmen, Des Yanimen i tokim yumi sampela rot long kamap gutpela bisnisman na kamap miliena.

SETIM GOL, GAT BIKPELA TINGTING NA MEKIM LIKLIK STAT

Raitim daun plen bilong wokim mani na wokim reviu gen long plen planti taim i ken helpim yu long kamapim sampela samting. Yu mas gat ol gol long sot tem (12-pela mun), medium tem (2-5 yia) na long tem (5-20 yia). Ol gol bilong yu mas lukluk long liklik bisnis pastaim na i go inap bisnis i kamap bikpela.

Planti taim bai yu lukim olsem taim ol pipel i laik painim sans bilong bisnis long kamapim planti mani hariap, ol bai ran stret i go long ol komesel benk na askim

long 100 pesen dinau long helpim projek bilong ol.

Ol i no wanbel taim benk i tok ol i mas i gat 30 pesen ekuiti long statim, ol i mas i gat sekyuriti bilong dinau na ol arapela samting benk i laikim long en.

Ol man nating i save ting olsem em i no isi long kamap miliena tasol em i no bikpela hatwok. Ol sans bilong multi milien kina kontrak na ol bikpela sans bai kamap long kantri bilong yumi long sampela taim bihain. Na long kisim ol dispela ol sans bilong milien kina wok, yu mas mekim sampela bisnis na i gat inap ol samting bilong wok long yu inap long kisim ol bikpela wok.

SEKIM YU YET- MI STAP WE NAU?

Askim yu yet, mi stap we nau? Mi kisim hamas long pe bilong mi? Mi gat hamas mani long seving akau nau? Wanem bisnis bai mi mekim wanpela taim? Mi bai nidim hamas long wokim dispela bisnis long bihain taim? Sapos yu no gat wanpela samting long statim,

dispela em i stat! Yu mas save long tru as bilong fainensel situesen yu stap long en olsem stating poin bilong kirapim bisnis.

OL SOT TEM GOL

Em ol taget yu setim long lukim olsem bai karim kaikai insait long wanpela yia. Ol i ken taget bilong wan wan de, wik, potnait, o mun. Yu nidim mani long statim olsem na yu mas gat gol bilong sevim mani. I gat tupela grup: (1) Daunim ekspens na yu sevim mani, eksampel, em sevim 20 pesen long pe bilong yu long wan wan potnait. Sapos yu no inap long daunim ekspens, painim narapela rot bilong mekim mani. Long dispela taim em olsem yu stat wantaim liklik mani tru. Eksampel, em salim mobail fon kat long opis o skul.

No ken wari long liklik mani tru yu sevim long wan wan de o wik. Em bai gro i go bikpela na bai givim yu moa strong long mekim moa samting long sevim planti moa. Na yu mas i gat fainensel disaplun.

IPBC, PNG Ports i gat bilip long CEO Alphonse

Stanley Nondol i raitim

Indipeden Pablik Bisnis Kopresen (IPBC) na bot bilong PNG Ports Kopresen i gat bilip long ol wok developmen i kamap aninit long Stanley Alphonse na i makim em namba tu taim long posisen bilong Sif Eksekutiv Opisa (CEO).

Bot siaman bilong PNG Ports, Nathaniel Poya i tokaut long dispela long las wik Fraide. Em i tok bot i amamas long gutpela wok bilong Mista Alphones na i bilip moa wok developmen bai kamap aninit long Mista Alphonse long ol yia i kam.

Menesing Dairekta bilong IPBC, Wasantha Kumarasiri na Mista Poye i tok bikpela senis i kamap pinis long PNG Ports long taim bilong Mista Alphonse na tupela i tok welkam long

Alphonse i kisim wok gen olsem CEO namba tu taim.

Dispela em i namba wan taim long PNG Ports i makim CEO bilong kampani long holim dispela wok long namba tu taim.

PNG Ports i ranim 15 bikpela bris long kantri na i gat moa long 850 wokman na meri long kantri.

Mista Alphonse i tok dispela yia i 40 yia bilong indepedens na taim bilong toktok planti i pinis.

Em i tok nau em i taim bilong mekim ol wok na ol pipel, gavman na ol stekholda bai lukim wanem wok i kamap na ol yet bai skelim.

Long las 3-pela yia, planti developmen i kamap pinis long ol bikpela bris olsem long Pot Mosbi, Lae na Rabaul na Wewak.

Ol developmen i kamap yet em Pot

Mosb bris bai ol i surukim i go long Motukea.

Developmen i kamap yet na IPBC wantaim PNG Ports bai klostu i pinisim ol liklik wok na muvim bris go long Motukea.

Narapela bikpela developmen em, PNG Port i tekova long bikpela bris long Lae. Lae i kamap bikpela bris bilong ol sip long Pasifik.

CEO Alphonse i tok 3-pela bris tasol i mekim winmani na planti bris long kantri i givim fri servis aninit long komyuniti servis obligesen na kampani i gat gutpela plen na ol wok i go het long stretim olgeta bris long givim servis long ol pipel bilong kantri.

Mista Alphonse i tok tenkyu long bot, IPBC na gavman i gat bilip long em na makim em gen long dispel wok.

Ol Mobail kren i rausim ol kontena long sip long Taidel Basil projek long Lae. IPBC i givim lae Pot i go long PNG Ports.



CEO bilong PNG Ports, Stanley Alphonse

Gavman tok orait long pawa na wara saplai bilong PMIZ

NESENEL Eksekutiv Kaunsil (NEC) i tok orait long wanpela sabmisin bilong indepeden pawa na wara saplaia bilong Pasifik Marin Industrial Jon projek.

Praim Minista Peter O'Neill i tok NEC i luksave long wanpela sabmisin we Minista bilong Tred, Komes na Industri, Richard Maru i salim i go long NEC long givim tok orait long wanpela indepeden saplaia bai givim wara na pawa saplai long PMIZ prokek.

Praim Minista O'Neill i tok NEC i tok orait long PNG Biomass long fainens na operesen bilong pawa jeneresen, trensmisin, distribusen, na salim i go long PNG Pawa na i go gen long PMIZ na Water PNG long fainensing operesen na wara ketsmen, distribusen na bilong ol klaien insait long PMIZ.

Mista O'Neill i tok Dipatmen bilong Tred, Komes na Industri bai bai mekim negosiesen na sainim agrimen wantaim PNG Biomass na Water PNG insait long 21 de long kabinet i tokorait long mekim ful

fisibiliti stadi long wara na pawa saplai projek.

O'Neill i tok NEC i luksave na taim em i givim tok orait, wanpela tim bilong gavman bai toktok wantaim patna long Projek Agrimen bihain long Stet Solisita i glasim na givim tok orait long draf agrimen long kabinet i oraitim.

Praim Minista O'Neill i tok NEC i go het na tok orait gen Dipatmen bilong Tred Komes na Industri long negosiet wantaim ol arapela bida sapos agrimen i no kamap wantaim tupela saplaia ol i makim long taim bilong ditel negosiesen.

"PNG i save saplaim 18 pesen bilong tuna long wol, em i makim 75,000 tan bilong pis ol i kisim long solwara bilong PNG long wan wan yia. Dispela i makim US\$1.5 bilien long wan wan yia."

"PNG i save kisim 2.8pesen bilong veliu long ol eksen na laisens fi."

Mista O'Neill i tok wantaim dispela PMIZ projek, tupela veliu wantaim bai go antap na moa mani bai kam insait long kantri.

ADB bai wok bung wantaim PNG

ASIAN Developmen Benk (ADB) i tok orait long wok bung wantaim PNG long stretim ol infrastraksa, kamapim ol wok na bisnis.

ADB i tok orait long wanpela Kantri Patnasip Streteji wantaim PNG long 2016 i go inap long 2020.

Aninnit long dispela wok-bung, ADB bai helpim PNG US 637 milien namel long 2016 na 2020 long stretim ol infrastraksa, kamapim moa wok, na bisnis long kantri (PNG) we i pulap long ol risos.

ADB bai helpim gavman bilong PNG long mekim driman bilong gavman i karim kaikai na dispela bai lukim invesmen bai kamap long transpot na eneji sekta, daunim kos bilong mekim bisnis na kamapim moa wok long kantri, kantri dairekta bilong ADB, Marcelo Minc i tok.

Em i tok bikpela wok long bisnis na ol arapela i kamap long PNG tasol i gat nid long moa wok bai kamap em i stap yet.

Bisnis long PNG i gro na bikpela mani i kam long akaun bilong kantri stat long 2002 bihain long gutpela makro-ekonomik menesmen, foren invesmen na hai komoditi prais, tasol bikpela pupulesen long rurel eria i no kisim gutpela servis long ol winmani bilong kantri. PNG i gat moa long 6 milien populesen na planti pipel moa i stap long ol rurel eria.

Egrikalsa em wanpela

bikpela eria stap we moa developmen i ken kamap na givim wok long ol yangpela pipel husat i painim wok. Transpot na ol arapela infrastraksa i no gutpela na sosel indiketa bilong PNG daunbilo tru long ol kantri i gat wankain ikonmik mak olsem PNG.

Dispela wok bung wantaim ADB bai lukluk long stretim nesenel transpot netwok long opim dua bilong wok bisnis long ol rurel eria we gutpela rot ken bringim moa pipel kisim ol gaden kaikai i kam long bikpela maket long taun.

ADB bai sapotim tu long pawa saplai i kam long rinuebel eneji bikos pe bilong disil long givim pawa saplai em i dia tumas, na tu disil i save bagarapim envairomen.

ADB bai helpim rurel praimerihelt ke, aben wara saplai na senitesen na sapotim wok bilong Maikro Ekspensen Program long ol pipel long kisim kredit o dinau mani long statim bisnis na groim bisnis. Australia gavman tu i helpim dispela projek.

ADB lukluk long helpim 90,000 man na meri long kisim besik fainesel edukesen long pinis bilong 2017.

Wanpela bilong ol eria we ADB na PNG gavman i mekim bikpela wok em ol projek long ol bikpela infrastraksa bilong kantri. Wanpela bilong ol em Lae Taidel Besin Projek na apgred bilong 220 kilomita long Hailans Haiwe.

Tait wara bagarapim gen bai pas wet krosing long Asas

James G. Kila i raitim

PAPA GOD tasol i kontrolim wanem taim ren bai pundaun na wara i tait, san lait na olgeta samting i drai, guria, bikpela win na maunten paia na tu gutpela taim wantaim, i no man long graun.

Long las wiken bikpela ren i pundaun antap long Finistia Rens long Madang provins i kamapim narapela bikpela tait wara gen i go daun na rausim ol wok i kamap long Asas we wanpela wet krosing we ol woklain bilong rot i wokim long sait long ol trak na bas i yusim long ran i go kam.

Gavana bilong Madang, Jim Kas i tokaut long dispela long midia long Tunde taim em i tokaut olsem Madang provins i wetim yet mani Nesenel Gavman i tok bai go long helpim ol pipel husat i kisim bagarap bihain long bikpela tait wara i bagarapim ples namel long Madang-Ramu haiwe long las mun.

Praim Minista Peter O'Neill i bin go long Aumia long rot namel long Madang na Ramu long helikopta na givim toktok long givim K1 milien long helpim ol lain i kisim bagarap long taim tait wara i bagarapim ples bilong ol na gaden kaikai.

Wantok Niuspepa i bin ran olsem long Asas long las wik na i lukim ol wokman bilong Woks Dipatmen na ol kontrakta i redim ol ples bilong wokim nupela bailei bris. Ol samting bilong wokim wok tu i stap long hap.

Wanpela projek ensinia bilong Woks Dipatmen, Anthony Ahuma i bin supavaisim ol wok long hap i tok olsem wok long putim bailei bris gen long Asas bai kisim samting olsem wanpela mun. Tasol long nau yet ol trak na ol bas bai yusim wet krosing long go kam long Madang.

Ol arapela bris em wok i orait pinis na dispela em long Kesawai na Dumpu.

Tasol Mista Ahuma i tok hevi nau i stap long longpela Aumia bris we nau i krungut na ol longpela semi-treila trak bai hat long ran antap long en.

Long narapela developmen tu i lukim ol lain bilong PNG Pawa Limited stretim na putim gen pawa lain we i bin bagarap bihain long tait i brukim daun na stopim pawa saplai i go long Madang.

Madang taun i save kisim pawa saplai bilong en i kam long Yonki pawa stesin yusim Ramu grid, tasol taim bagarap long tait wara i kamap na pundaunim sevenpela pawa pos long rot namel long Aumia na Ramu, pawa saplai go long Madang i bin bungim hevi long las mun na i bun lukim planti blekaut long Madang taun.

Bikpela main divelopa, Ramu NiCo Menesmen (MCC) tu i wok long bungim hat taim stret bikos planti ol bikpela spea pats bilong masin na fuel we em i save kisim i kam long Lae i no wok long go antap long Kurumbukari Main bihain long bris i bruk. Long nau yet ol i wok long kisim fiul long Madang.



Bikpela tait wara long las wiken i bagarapim dispela wet krosing long Asas. Poto: James G. Kila

Wantok Niuspepa soim stori bilong bagarap

James G. Kila i raitim

PLANTI ol manmeri na pikinini long ol viles na hauslain namel long Madang Ramu haiwe we i bin bungim bikpela ren na bikpela tait wara na tait wara i bagarapim ples bilong ol.

Ol i no bin save olsem nius bilong ol em PNG i save bikos **Wantok Niuspepa** i kisim nius na poto na salim long gavman na ol atoriti i luksave long hevi i kamap long hap.

Long las wik ripota James Kila i wokim raun bilong em long lukim ol hevi stat long Aumia bris i go long Asas, Kesawai na go long Dumpu na karim sampela **Wantok Niuspepa** long givim i go long ol manmeri long rot. Taim ol lain na ya i opim niuspepa na lukim stori bilong ol, olgeta i amamas stret.

Long poto antap em ol lain yangpela man bilong ples Asas husat i givim sekyuriti taim ol masin i wok long redim ples long wokim nupela balei bris long Asas riva. Pastaim bris long hap em bikpela tait wara i kamautim na karim i go na blokim trefik i go olsem long Madang.

Foapela bris i bungim bikpela bagarap stret long namel long mun Mas na i givim bikpela hevi tru

long saplai i go long Madang. Pawa saplai i go olsem long Madang tu i bin bagarap taim 7-pela pawa lain i bruk pundaun.

Ol yangpela man long Asas i amamas tru long kisim **Wantok Niuspepa** na ritim ol stori bilong bagarap na tu ol arapela stori i kamap nabaut long kantri na long wol.

Wanpela long ol, George Arnold, i tok **Wantok Niuspepa** em niuspepa bilong ol grasrut lain long PNG stret bikos em i givim gutpela infomesen long Tok Pisin, we ol liklik manmeri long ples i ken ridim na save gut long wanem samting i kamap long PNG na long wol.

Arnold i givim salens long ol **Wantok** ripota tu olsem ol mas raitim gut ol nius long Tok Pisin stret na no ken tanim ol tok long Inglis na yusim long stail bilong tok Inglis. Dispela sampela taim i save paulim tingting bilong ol lain i ridim niuspepa.

Tasol em i tok em i amamas stret long kisim fri **Wantok Niuspepa** long bus ples bilong en we em i stap was long wok i kamap long bagarap kamap long Asas bris. Em i tok em i ritim pinis niuspepa bai em i stori long lapun papa bilong em na ol arapela lain famili.

Ol 144 komyuniti grup bai givim sevis long Pasifik Gems

SAMTING olsem 144 komyuniti grup long Pot Mosbi bai givim sevis long taim bilong Pasifik Gems long mun Julai.

Long las wik, Gems Ogenaising Komiti (GOC) i bin sainim kontrak wantaim ol dispela grup.

Eksekutiv Menesa bilong Operesens wantaim GOC, James Flint i tok tingting bilong ol long kisim ol komyuniti grup em long planti kontrak na bikpela milien kina i go long ol lokal bisnis, dispela program bai helpim ol komyuniti grup long mekim

mani long ol sios grup bilong ol, ol spot, yut na meri grup na moa.

Program i bin kisim moa long 1,000 i kam long ol grup long las yia na ol bai help klinim ol ples bilong pilai, ol lain i go lukim pilai i ken baim ol kaikai na sof dring long ol, na mekim ol arapela teknikel wok tu.

Ol 94 long ol grup em ol katering lain na 54 bai klinim ples na lukautim na rausim ol pipia.

Olgeta bai bihainim ol rul bilong GOC.



Panapana Wimens grup i wanpela long ol i winim kontrak long Komyuniti grup wok long Pasifik Gems. Poto: GOC Midia



Ol yangpela man bilong ples long Asas i amamas long ritim stori bilong bagarap i kamap long bris na rot long Madang Ramu haiwe taim niusman James Kila i givim ol fri **Wantok Niuspepa** long ol long eria we bagarap i bin kamap na wok bilong stretim ples i kamap nau. Poto: James G. Kila

Maersk i strongim tred namel long Amerika na PNG

NUPELA rot i op nau long PNG i ken salim ol komoditi o ol egrikalsa krop na ol arapela samting i go i kam namel long PNG, Amerika na wol.

Dispela i kamap wantaim kontena sip bilong Amerika, MV Maersk Alabama bai save raun i go na i kam namel long Amerika na PNG long karim ol kago we PNG i save salim i go ovasis na moa yet, kakau na kopi. Namba wan taim sip Maersk i bin kam

long PNG na statim rot em long 2011 we sip i go long ol bris olsem Mosbi na Lae. Dispela i lukim olsem insait long tupela wik, tupela sip i raun i kam long ol dispela bris.

Dispela nupela PNG rot bilong sip i konektim ol impota ol lain i laik baim ol samting long PNG, na ol lain i salim ol samting i go aut long ovasis i go long global o netwok long wol bilong Maersk. Dispela i givim sans long PNG long mekim

i go bikpela resis long tred long wol stej.

“Mipela i amamas long lukim olsem tred namel long Amerika na PNG i wok long go bikpela. Mi tok tenkyu long Maersk long strongim dispela wok,” Embaseda North i tok long taim em i bin welkamim sip long Mosbi.

Stori bilong Maersk Alabama i bin kamap long muvi, “Captain Philips” taim 4-pela pairet o ol sitlman long solwara i bin atekim sip long 2009 long nambis bilong Somalia

taim em i karim ol rilif saplai o helpim kago na kaikai i go long Somalia na Uganda. Ol sitlman i bin holim kepten bilong sip long dispela taim, Kepten Philips, tasol tripela de bihain ol nevi bilong Amerika i bin sevem em.

Maersk Siping Lain i hap long Maersk Grup na hetkwata i stap long Kopenhagen long kantri Denmark. Moa long 90,000 pipel long 130 kantri long wol i wok long dispela kampani.



Ramu NiCo Stretim Bikpela Bagarap long Madang Haiwe Rot

RAMU NiCo Menesmen (MCC) Limited i soim tru kala bilong en olsem em kampani husat i gat gutpela bel na i laik helpim ol pipel bilong Madang taim i gat bagarap o hevi i kamap.

Kampani ya i save soim planti helpim long ol lokal komyuniti long ol impekt eria o ples we operesen bilong en i stap long en long sait long helt, edukesen, sosel sevises na tu givim wok long ol lokal pipel.

Ating planti lain husat i save ron long PMV bas na trak long rot bilong Madang-Lae haiwe bai save olsem planti ol seksen bilong rot i bagarap stret bihain long bikpela ren i pundaun na wokim graun i bruk long ol seksen bilong rot.

Wanpela hap we i gat bikpela bagarap tru em long Iguruwe insait long Usino LLG. Long dispela hap em i gat bikpela baret tru i kamap taim graun i bruk bihain long bikpela ren. Na dispela bikpela baret i daun-bilo tru olsem 20-mita na sapos wanpela kar o PMV bas i abrus na pundaun ating ol manmeri o pasindia bai indai o kisim bikpela bagarap tru.

Ramu NiCo i luksave long dispela bikpela bagarap bai i kamap long rot, na kampani long laik na tingting bilong en yet i yusim ol lain wokman na masin bilong en bilong Paiplain Dipatmen long statim wok long fiksing na stretim dispela bikpela bagarap rot long Iguruwe seksen bilong Madang haiwe.

Maski, olsem dispela bikpela Madang-Ramu haiwe em i kam ananit long lukaut bilong Nesenel Woks Dipatmen bikos em nesenel rot, Ramu NiCo i soim gutpela pasin olsem wanpela divelopa bilong risos insait long Madang provins na i wok nau long stretim dispela bikpela bagarap long rot.

Mani mak bilong wokim wok em bai antap tru bikos, Ramu NiCo bai yusim masin bilong en yet long kamapim narapela nupela eria bilong rot we em i seif long pablik trenspot i yusim. Dispela em bikos hap sait bilong rot long Iguruwe em bikpela baret tru na sapos pablik trenspot olsem PMV bas na trak i abrus, sore tumas ol manmeri bai indai o kisim bikpela bagarap tru long bodi bilong ol.

Oi woklain bilong Paiplain Dipatmen i yusim ol bikpela masin bilong ol olsem ekskeveta long kliarim ples na digim baret long putim ol ston-

basket long strongim graun. Ramu NiCo i yusim ol bikpela tipa trak bilong en long karim ol bikpela ston antap long Kurumbukari Main pit eria i go daun na kapsaitim.

Wanpela gutpela samting Ramu NiCo i wokim em taim em i kisim sampela ol lokal man long ples long helpim long pulumapim ol ston basket long strongim ol kisim liklik pei mani.

Ramu NiCo i wokim liklik kemp bilong en long eria bilong kaunsila Moses Ruwara long Iguruwe em i putim ol masin bilong en na redim ol bikpela waia basket bilong pulumapim ol ston long stretim bikpela baret na rot long Iguruwe.

Long stat bilong dispela yia 2015, Ramu NiCo Paiplain Dipatmen i bin wokim planti bikpela wok long rot bihain long ren i pundaun na bagarapim rot.

Namba wan wok em i wokim em long Naru Bris eria, we bikpela tait i bagarapim ples. Ramu NiCo i yusim ol masin na wok man bilong em long stretim ples na wokim ol ston baset long banisim sait sait bilong wara i ron na nau ples i luk orait.

Narapela bikpela wok Ramu NiCo i wokim em long stretim rot we graun i bruk klostu long Kawawar maket. Dispela tupela i pinis na rot nau i stap orait.

Insait long ol arapela tupela wok Ramu NiCo i yusim tu ol lokal man long ples long wok olsem kesual long stretim rot. Dispela i givim sans long ol lokal lain long kisim mani long helpim sindaun bilong ol wantaim femili bilong ol long ples na haus lain.

Sapos ol lida bilong Madang provins na nesinol gavaman i kamap wantaim gutpela tingting bai ol i wok bung wantaim Ramu NiCo ananit long PPP (pablik-praivet-patnasip) program we save na mani ol i ken bungim wantaim long stretim dispel Madang-Lae aiwe na ol pipol i ken ron gut.


Maski i gat planti risos long kantri na bikpela tex mani gavaman i kisim tasol long stretim ol bikpela infrastraksa olsem rot em planti taim gavaman i no save yusim gutpela tingting na risos we i save givim bikpela hevi long ol pipol.

Tasol Ramu NiCo i soim stret hetok na tingting bilong em, 'Wanpela Ramu NiCo, Wanpela Komyuniti' pasin na i stretim ol dispel rot.

Bikpela baret long nesenel rot long Madang haiwe long Iguruwe.



Oi wokman bilong Ramu NiCo i klinim ples long stretim rot.



Oi Ramu NiCo Paiplain Dipatmen wokman wantaim ol lokal man blong Iguruwe i stretim baret wantaim ol ston basket



Ramu NiCo Management (MCC) Ltd,
the manager of Ramu NiCo Project is proud to host the 5th
NATIONAL MINING EMERGENCY RESPONSE CHALLENGE
in Madang
Date: August 22-25, 2015
Venue: DWU & PNG Maritime College



Oil Search Pasifik Gems baton kisim naispela Madang welkam

Tok lukaut long yusim Gems na Tura logo



Tupela mama bilong Bilbil i sanap wantaim deputi gavana bilong Madang Rama Marisan long welkam long Pasifik Gems baton. Poto: James G.Kila

James G. Kila i raitim

OIL Search Pasifik Gems baton i kisim gutpela welkam stret taim em i go pundaun long Madang ples balus long las wik Fraide.

Ol tumbuna singsing grup bilong Bilbil i welkam wantaim singsing na deputi gavana bilong Madang, Rama Marisan i welkam long en na bringim i go long Madang provinsal gavman semba na bihain em i raunim Madang taun. Wanpela grup man i ran long wilwil long sait sait bilong kar i karim baton na bringim em i go long

taun. Dispela i soim naispela kala stret.

Long Sarere baton i kalap long kar na go antap long Trens-Gogol rot na kisim naispela ol tumbuna kastom welkam long ol lokal pipel bilong Wali kantri na kam bek long taun na go olsem long Bilibil viles we ol pipel i save wokim graun sospen.

Bihain em i ran long bot i go long taun na stop long Kalibobo na bihain ol lain i bringim em raunim taun i go olsem long lukim ol feveret tim bilong provins Madang FC i pilai wantaim Besta Yunaitet FC. Go bilong baton i givim sampela kain pawa long Madang FC na ol i

winim Besta FC 3-2.

Wokabaut bilong baton long Kalibobo rot i lukim Sif Jastis, Sir Arnold Amet i karim baton na bihain ol foma gold medal wina bilong Saut Pasifik Gems long lon-bouls long 1979 Fiji Gems, mama Rose Kambual na arapela meri Penny Sape i karim na wokabout long soim olsem ol stap laip yet.

Long Sande baton i ran bihainim Not Kos Rot (NCR) i go long Malala na kam bek long taun. Planti manmeri na pikinini i sanap long rot long lukim na tromoi han na amamas long lukim baton i soim pes long ples bilong ol long Madang.



Sampela ol bokis toilet pepa ol i painim na kisim i gat Gems na Tura logo long ol.

TOK lukaut i go long ol lain i menufeksera, distribute na riteila long no ken kamapim, baim o salim ol samting i gat logo bilong Pasifik Gems na Tura long ol.

Sif Eksekutiv Opisa (CEO) bilong Gems Ogenaising Komiti (GOC), Peter Steward i

tokaut long dispela bihain long Gems Enfosmen Yunit i go insait long wanpela wehaus long Gordons, Mosbi long las Fraide na painim moa long 800 bokis toilet pepa na ol narapela samting i gat ol logo o mak bilong Pasifik Gems na Tura.

Mista Steward i tok ol bisnis kampani i mas klia olsem Gems na Tura logo o make m ol rijista tredmak bilong 2015 Pasifik Gems na ol bisnis i no ken yusim nating wantaim no gat toksave long mekim mani long en.

Em i tok i moabeta long ol ol guts distribute

na riteila i wok long yusim ol logo bilong Gems na Tura long sek wantaim ol pastaim long abrusim ol i kisim ol prodak bilong ol.

Long las mun, ol i bin rausim ol ki teg wantaim Gems na Tura logo long wanpela stoa insait long Visen Siti

Wok long Gems Viles go gut

...fitim ol bet frem nau

OL wok long Pasifik Gems Viles long Yuni-vesiti bilong PNG eria i go gut na bai pinisi long taim stret bilong em.

Long dispela wik Tunde, Gol spona bilong Gems, Brian Bell Home Centre, i stat long putim moa long 4,000 bet frem i go insait long ol akomodesen blok.

Gem Ogenaising Komiti (GOC) i tok ol wok long dispela bai pinis insait long tupela mun i kam, na Pacific Foam kampani i redim pinis moa long 1,000

matres long putim long ol bet.

Long neks mun Me 18, sip bai kisim i kam moa long 16,000 betsit.

Sif Eksekutiv Opisa (CEO) bilong GOC, Peter Steward i tok dispela i bikpela samting taim ol i skruim wok i go het long ol wok redi bilong Gems long mun Julai.

Em i tok Pasifik Gems Viles i bikpela samting bikos ol i laik givim gutpela ples bilong slip na malolo i go long ol pilaia i kam long ol Pasifik



Ol Brian Bell wokman i stretim ol bet frem. Poto: MadNESS Photography

kantri na ol arapela long en.

Samting olsem 4,000 etlit na ol Gems opisel bai slip long UPNG Pasifik Gems Viles na bai i gat ples bilong kaikai tu

Olgeta wok long dispela Gems Viles bai pinis na redi long Jun 15, na long Jun 30, em bai kisim ol namba wan etlit i kam long Gems.

Stop N Shop na Pos PNG patna wantaim Pasifik Gems long salim ol tiket

EM bai isi long pablik long baim ol 2015 Pasifik Gems tiket nau bihainim wok patna namel long Gems Ogenaising Komiti (GOC) na bikpela supamaketa kampani na ol arapela bisnis haus.

Dispela i bihainim wok patna long salim ol tiket namel long GOC, Siti Famasi Group o CPL grup na Post PNG.

Las wik Fonde i bin lukim lonsing bilong moa tiket long Sentrel Waigani na i opim dua long mekim isi long pablik i baim ol tiket taim ol i go wokim sopong long ol Stop n Sop supamaketa han long Mosbi olsem long Badili, Boroko, Not waigani, Taun, Sentral Waigani, Express Airways na Express Deloitte.

Sif Eksekutiv Opisa (CEO) bilong GOC, Peter Steward i tok wok bilong salim ol tiket i ran gut na ol i salim moa long 1,500 tiket insait long wanpela de long ol Benk Saut Pasifik (BSP) hap.

Em i tok wantaim ol nupela hap, i gat 27 ples long salim ol tiket bai ranaut hariap.

Ol happles bilong Post PNG we i salim ol tiket em long Visen Siti na Watafran.

Jenerel Menesa bilong CPL Koimesel, Omprakash Shashdri i tok CPL i wokim disisen long patna wantaim Pasifik Gems bikos long strongpela tingting bilong ol long sapatim spots we i wankain wantaim Gems lain.



Pikinini i putim tumbuna bilas na karim baton long Yonki Wara. Poto: MadNESS Photography

Baton go long Yonki Wara

LAS wiken i kam inap nau i lukim Pasifik Gems Rillei Baton long Madang na nau long Hailans rijon.

Gutpela na kala welkam i bin kamap taim Pasifik Gems Rillei Baton tim i kamap na raun long ol ples na skul long Madang.

Long dispela wik Tunde, tim i go antap long Hailans rijon na lsten Hailans i bin

namba wan provins i lukim na welkamim baton long rijon.

Gavana Julie Soso taim em i welkamim tim i bin tok sans long baton i go long provins i yunaitim yumi wantaim wol long go insait long Gems.

Em i tok spirit bilong 2015 Pasifik Gems em i spirit bilong yuniti na i as tingting bilong kamapim kantri PNG tu.

Em i tok strongim ol etlit bilong PNG long pilai strong na taget na wokim gut.

Long Tunde, Tim i bin kamap long Yonki na, wanpela spona em PNG Pawa i bin putim kamap naispela rillei so long ol famili na komyuniti long hap.

Aste, tim i bin go olsem long Kundiawa na bihain, long ol arapela hailans provins.

Ragbi nius bilong dispela wik



Ol sapota bilong Bombers bai i no inap long lusim ting hariap long dispela gol. I gat liklik taim tasol i stap bipo long gem i pinis na ol tu i ting olsem ol i no gat sans moa. Tasol ol Bombers em wanpela tim husat i no save givap hariap maski sapos ol i wok long lus.

Cale Hooker i kamap top pilaia bilong dispela gem Em i no save givap hariap long taim bilong pilai. Tasol em tu i tok olsem olgeta long tim i bin pilai gut tru na dispela i sevim ol. Em nau dispela gol na kik i sevim ol na daunim ol biknem tim Hawks.

Not Kwinslan Cowboys winim South Sydney Rabbitohs

Not Kwinslan Cowboys i putim wanpela stail trai stret long namba tu hap bilong gem na winim gut tru ol South Sydney Rabbitohs 30-12.

Ol dispela top pilaia i bin go pas 12-4 long hap taim bikos long strongpela difens na strongpela difens tasol ol Cowboys i kam bek strong tru long namba tu hap bilong gem na bringim skoa i go antap long 26 poin we ol Rabbitohs i no inap long bekim. Na dispela i mekim ol i winim 3-pela gem nau.

Dispela gem i stap namel long tupela top

pilaia Greg Inglis na Thurston. Stail bilong ol i soim tru olsem ol i top pilai bilong Kwinslan.

Inglis i statim pilai long ful-bek tasol em i go insait na i kontrolim gem long tim bilong em. Dispela i mekim ol Cowboys i painim taim long brukim banis. Thurston, i stap namel long ol Cowboys na stiaim ol long painim spes bilong brukim banis.

Justin O'Neill, Antonio Winterstein na Jake Granville i putim sampela trai tu. Na long ol Rabbitohs tupela trai i bin kam long David Tyrrell na Alex Johnston.



Justin Hodges fit long Broncos NRL kles wantaim St George

Kepten bilong Brisbane Broncos Justin Hodges i tok em i 100 pesen fit na redi long kam bek long taim tim bilong em i pilai egens St George Illawarra long Fraide.

Hodges i no pilai long tupela gem bilong Broncos bikos long bagarap long masol long lek bilong em.

Tasol bihain long trening long Tunde em i tok olsem em i fit long pilai long Fraide.

Brisbane i wanpela tim tasol long winim 5-pela raun long namba wan raun long 6-pela raun we ol i winim Roosters 22-18 long Fraide nait.



Greg Inglis tokim South Sydney long stap strong



South Sydney kepten Greg Inglisi i tok ol i no ken yusim bagarap Adam Reynolds i kisim na lmekim tim bilong ol i pundaun i go daun long lata. Rabbitohs i lus 30-12 long tim bilong Johnathan Thurston na ol North Queensland

long Olympic stedium long Mande i givim Brisbane sans long go pas bihain long 6 raun.

Ol pilai i no bin kisim gutpela sapot bilong Reynolds tasol Inglis i tok ol Rabbitohs i mas pilai strong sapos ol i laik stap antap long lata.

Brumbies bai kisim taim

Ol Brumbies bai kisim taim bihain long ol Blues i autim ol long Super Rugby long Fraide nait.

Five-eighth Matt Toomua bai stap long saidlain inap 4 o 6 wik bikos em i kisim bagarap long lek bilong em.

Five-Test Wallabies prop Scott Sio, husat i bin go aut long hap taim i bin kisim bagarap long skru bilong em.

Sapos Toomua inap kam bek long foapela wik bai em i stap insait long tim bilong Brumbies i go long Saut Afrika long mun Me.



Oil Search Pasifik Gems baton kisim naispela Madang welkam

James G. Kila i raitim

OIL Search Pasifik Gems baton i kisim gutpela welkam stret taim em i go pundaun long Madang ples balus long las wik Fraide.

Ol tumbuna singsing grup bilong Bilbil i welkam wantaim isingsing na deputi gavana bilong Madang, Rama Marisan i welkam long en na bringim i go long Madang provinsal gavman semba na bihain em i raunim Madang taun. Wanpela grup man i ran long wilwil long sait sait bilong kar i karim baton na bringim em i go long taun. Dispela i soim naispela kala stret.

Long Sarere baton i kalap long kar na go antap long Trens-Gogol rot na kisim naispela ol tumbuna kastom welkam long ol lokal pipel bilong Wali kantri na kam bek long taun na go olsem long Bilbil viles we ol pipel i save wokim graun sospen.

Bihain em i ran long bot i go long taun na stop long Kalibobo na bihain ol lain i bringim em raunim taun i go olsem long lukim ol feveret tim bilong provins Madang FC i pilai wantaim Besta Yunaitet FC. Go bilong baton i givim sampela kain pawa long Madang FC na ol i winim Besta FC 3-2.

Wokabaut bilong baton long Kalibobo rot i lukim Sif Jastis, Sir Arnold Amet i karim baton na bihain ol foma gold medal wina bilong Saut Pasifik Gems long lon-bouls long 1979 Fiji Gems, mama Rose Kambual na arapela meri Penny Sape i karim na wokabaut long soim olsem ol stap laip yet.

Long Sande baton i ran bihainim Not Kos Rot (NCR) i go long Malala na kam bek long taun. Planti manmeri na pikinini i sanap long rot long lukim na tromoi han na amamas long lukim baton i soim pes long ples bilong ol long Madang.



Tupela mama bilong Bilbil i sanap wantaim deputi gavana bilong Madang Rama Marisan long welkam long Pasifik Gems baton. Foto: James G.Kila

Digicel PNG tokaut long Sponsasip

Nicky Bernard i raitim

DIGICEL PNG i kam gut gen long dispela yia 2015 na yia i kam 2016 long sponsasip bilong ol wantaim K2.4 milien long sapotim gen bikpela ragbi lig insait long kantri Digicel Kap.

Digicel i bin saponsa long dispela semi profesenel ragbi lig long 4-pela yia na dispela yia bai namaba 5 yia bilong ol long kamap neming rait sponsa.

"Mipela i amamas long sapotim ol spot insait long kantri olsem dispela

bikpela ragbi lig kompetisen we planti ol sapota save bihainim. Na mipela laikim dispela bikpela kompetisen bai go strong moa yet long tupela yia wantaim sponsasip bilong mipela Digicel,". Het bilong Konsuma bilong Digicel Khattar Fehmi i tok.

Em i tok tu olsem, Digicel em i bikpela sapota bilong ol spoting kod insait long PNG na Pasifik rijon na bikpela tingting bilong ol long sapotim ragbi lig em long ol yangpela ken soim pilai na stail bilong ol.

Siaman bilong PNGNRL Sudhir Guru, i tok tenkyu long Digicel PNG

long sapot bilong ol long sponsa long dispela bilong bikpela ragbi lig resis long 5-pela yia. Em tok ragbi lig i save bringim olgeta manmeri kam bung wantaim long sapotim tim bilong ol.

Em tok tenkyu tu i go long John Mangos husat bai lusim Digicel PNG long gutpela sapot bilong em long ragbi lig insait long kantri.

Digicel Kap bai stat long dispela wiken na bai i gat 11-pela tim bai resis long kisim dispela kap, nupela tim bai soim pes long dispela yia em long Waghi Tumbe bilong nupela provins Jiwaka.

Blakbokis Madang FC redi tasol long bungim bataplai bilong Oro long Laiwaden

James G. Kila i raitim

OL STAIL blakbokis bilong Madang i redi tasol long bungim ol bataplai bilong Oro long dispela wiken taim Madang FC i bungim Oro FC long pilai bilong ol insait long Telikom Nesenel Soka Lig resis long dispela wiken long Madang.

Las wiken ol blakbokis bilong Madang i pilai smat tru na kaikaim stret Besta FC 3-2 long gem bilong ol long Laiwaden long Madang. Dispela wiken tu bai lukim Madang FC i skelim strong bilong ol bataplai bilong Oro FC long Laiwaden oval. Turangu ol boi Oro FC i no bin laki tumas las wiken taim ol i lus long Lae City Dwellers 0-6 long

gem bilong ol long Lae.

Madang FC long dispela wiken bai lukim kambek bilong kepten bilong ol Max Sengum long midfil na dispela bai strongim midfil wantaim sapot bilong stail mangi Alwyn Komolong. Long fran lain i gat strongpela straika olsem Samuel 'SK' Kini na mangi Begesin yet Sammy Hiob i stap long solapim umben bilong ol birua bilong ol. Kosa bilong Madang FC, Francis Moyap nau i mas lukluk moa long redim gut ol straika bilong em long no ken pilai kaskas nabaut na sutim bal strong long umben bilong ol birua bilong ol.

Oro FC i gat sampela ol strongpela pilai wantaim eksperiens i stap olsem

Michael Foster husat i ken stiarim ol boi bilong em long banisim ol blakbokis.

Long ol arapela gem bilong Telikom NSL pilai long dispela wiken bai lukim Besta Yunaitet i pilai wantaim Lae City Dwellers long Lae, na POM FC bai bungim Hekari. Tasol ripot i soim olsem Hekari nau i stap insait long Osenia Klap futbol sempions pilai long Fiji na bai no inap stap long gem dispela wiken.

Gem bilong Madang bai paia lait stret bikos ol blakbokis bilong Madang FC i save gat planti na strongpela sapot tru i kam long ol pipel bilong Madang long olgeta kona bilong provins.



Madang FC. Foto: Nicky Bernard

Pot Mosbi Ragbi lig sisen i stat

POT Mosbi ragbi lig i statim sisen bilong ol long las wiken, planti bilong ol olupela tim i stap yet long traime long kisim kap long pinis bilong yia.

PRL opis i tokaut long 14 tim bai resis long dispela yia, dispela ol tim husat i rijista na baim pilai fi i ken kisim pilai graun na pilai.

Sampela tim i no baim yet fi bilong ol na sapos ol i pilai bai ol i lusim poin i go long narapela tim. Olsem na opis bilong PRL i askim olgeta klap long bai fi bilong bipo long

ol pilai long wiken i kam. Long las wiken, Kone Storm, Royals, Dobo Warriors, Butterfles na Tarangau i bin winim pilai bilong ol long stat bilong sisen.

Sampela tim i no soim pes long las wiken i bin fofit i go long narapela tim husat bin stap long pilai graun.

Dispela wiken i raun tu bilong kompetisen na olgeta tim i mas soim pes long pilai, husat tim i no kamap bai kisim mekim save long bod bilong PRL.

TV WILL NEVER BE THE SAME AGAIN

PURCHASE A DIGICEL PLAY BOX FOR K169 AND ENJOY 29 OF THE BEST TV CHANNELS FREE* FOR A LIMITED TIME.

29 TV CHANNELS OF THE BEST

MOVIES
SPORTS
NEWS
KIDS

COMING SOON TO MADANG

DIGICELPLAY.COM.PG | DIAL 180 1515 FOR DETAILS.

All new Digicel Play Boxes will receive up to 14 Days complimentary TV 29 Channels. To activate your Digicel Play Box please call 180 1515 and a Customer Care agent will assist you with the process. Coverage currently in Port Moresby, Lae, Buika, Kokopo, Mt Hagen and expanding throughout 2015. For more information call Customer Care on 1515 or 180 1515

Ol wiken spot long poto

Ol poto: Nicky Bernard



- 1 **BAI YU GO WE:** Pilaia bilong Pom FC i putim was gut long lek bilong pilai bilong Admiralty long pilai bilong long wiken. Admiralty i winim dispela pilai.
- 2 **SEKIM GUT:** Ol mama bilong Marl Bareks Bouling Klap i wok long prektis long bouling long wiken.
- 3 Tim Madang FC i redi long pilai long wiken i go pinis. Dispela wiken ol bai kisim Oro FC.
- 4 **KIK OV TAIM:** Nupela CEO bilong Digicel PNG, Maurice McCarthy na PNGRFL Siaman Sudhir Guru i sanap wantaim olgeta kepten bilong 11-pela tim husat bai resis long Digicel Kap.



1

2

3

4

IMPROVED TASTE! Niupela teist wantaim planti mit na oil. Teistim na bai yu laikim moa yet.

DIANA

Tuna



Emi tuna
bilong PNG

PROUDLY
PNG
MADE

Manufactured by



RD Tuna Canners Ltd.

Moa mit na
oil insait



DIANA Blu

TUNA IN OIL

Oil Search rilei baton stap long Kundiawa



OIL Search Pasifik GEMS Rilei i stap nau long Kundiawa long Simbu Provins bihain long em i lusim Yonki na Goroka long Isten Hailens long Trinde.

Dispela Oil Search Baton i go insait long 21 de bilong em nau long raunim olgeta provins bipo long em kamap long Pot Mosbi long namba 4 de bilong mun Julai long opening seremoni.

Oil Search Pasifik Gem Baton i raun pinis long 4-pela provins we em i stat long Wes Sepik i kam long Is Sepik bihain em i kam daun olgeta long Madang na stat long

bihainim haiwe bilong Hailans i go olsem long Isten Hailans, na nau i stap long Simbu.

Namba 6 provins bai Oil Search Baton i go long en em long Westen Provins. Dispela provins i gat bikpela hap eria. Planti ol pipel long Westen bai amamas tru long lukim dispela Baton long Provins bilong ol. Ol tu i gat planti stail bilong tumbuna i stap na bai ol i soim kala bilong ol.

Nau yet yumi gat 79 de moa long lukim opening bilong dispela bikpela Pasifik GEMS bai kamap long kantri bilong yumi, PNG.

Oil Search Baton i raun long Madang wantaim kainkain stail. *Poto: MadNESS Photography*

Senisim long Sensi

Next time you change your
baby, change to Sensi Diapers.

Good Products, Better Prices, ikam long



Johnstons Pharmacies Ltd

P.O.Box 1066, Boroko, Papua New Guinea.

Tel +675 325 3185 Fax +675 325 0190 Email sales@johnstons.com.pg